



## Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ  
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonCommercial  
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով  
ձևափոխել կամ օգտագործել առկա նյութը ստեղծելու համար նորը

You are free to:

**Share** — copy and redistribute the material in any medium or format

**Adapt** — remix, transform, and build upon the material

15 JAN 2010

05 FEB 2007

329.14  
R-95

Թի 7, Հրատարակութիւն «Հայրենիք»-ի

ՌՈՒԿԱ ՍՈՅԻԱԼ - ՅԵՂԱՓՈՒԱԿԱՆՆԵՐԻ

Ծ Ր Ա Գ Ի Ր Ը

Թ Ա Ր Գ Մ Ա Ն Ե Ց

Ն. Հ Ա Ն Գ Ո Յ Ց



Պ Օ Ս Թ Ը Ն

Տ Պ Ա Ր Ա Ն Հ Ա Ս Ե Ր Ն Ե Ի Ի

1909

8705 JUL 15

Թիւ 7, Հրատարակութիւն «Հայրենիք»-ի

29.14 (17)

-95

ՌՈՒՍ ՍՕՑԻԱԼ - ԶԵՂԱՓՈՒՍԱԿԱՆՆԵՐԻ  
Ծ Ր Ա Գ Ի Ր Ը

Թ Ա Ր Գ Մ Ա Ն Ե Ց

Ն. Հ Ա Ն Գ Ո Յ Ց



622

Գ Օ Ս Բ Ը Ն

Ց Պ Ա Ր Ա Ն (Հ Ա Յ Ր Յ Ն Ի Ք) . Ի

1909



20.565

24 JUL 2013

ՀԱՅԱՍՏԱՆԻ ԴԱՐՈՒՄԻ ՆԱԽԱՐԱՐՈՒԹՅԱՆ ԿԵՆՏՐՈՆ

ՀԱՅԱՍՏԱՆԻ ԴԱՐՈՒՄԻ ՆԱԽԱՐԱՐՈՒԹՅԱՆ ԿԵՆՏՐՈՆ

Գ Գ Դ Բ Ս Գ Գ

ՄԱՐԿԱԿԱՆ ԿԵՆՏՐՈՆ



4188

39

## ԵՐԿՈՒ ԻՕՍՔ

Շատ տեսակէտներով օգտակար է, որ հայ ընթերցողը ծանօթանայ ուսու ընկերվար-Յեղափոխականների ծրագրին: Նա մի ամբողջական և ամփոփ աշխարհահայեացք է՝ յենած մի կողմից գիտութեան, և միւս կողմից ուսու ժողովուրդի խորին ուսումնասիրութեան վրայ: Նա ուսու առաջադէմ մտքի լաւագոյն արտայայտութիւնն է: Նրա դրած պահանջները ամենից լաւ լուծում են բազմամիլիոն և այլատարր կայսրութեան թէ՛ քաղաքական և թէ՛ տնտեսական կնճռոտ հարցերը: Նա հանդիսանում է համամարդկային գաղափարների ազգայնացման ամենալաւ նմուշներից մէկը:

Մեր ամենից զօրեղ ու ծաւալուն կազմակերպութիւնը՝ Հ. Յ. Դաշնակցութիւնը՝ սերտ առնչութիւն ունի ընկերվար-յեղափոխականների հետ թէ՛ տեսական և թէ՛ գործնական ասպարէզում: Հետաքրքիր ընթերցողին այս գրութեամբ մենք տալիս ենք համեմատութեան մի եզր: Երկու ծրագրի ակնյայտնի նմանութիւնները պարզ փոխադրութեան արդիւնք չեն, այլ հետեանք նոյն արմատից աճելուն: Հ. Յ. Դաշնակցութեան ականաւոր հիմնադիրներից մի քա-

նիսը ապրել ու շնչել են նոյն հոգեկան մթնո-  
լորտում, ուր աճել են ընկերվար-յեղափոխական  
կուսակցութեան հիմնական գաղափարները:

Մեր գրութեան հիմքը կազմում է այն ծրա-  
գիրը, որ մշակած և հաստատւած է 1906 թ. Ա.  
Ընդհանուր ժողովում:

Նիւթը հետաքրքրական դարձնելու համար  
չարագասութեան տւել ենք բանախօսութեան  
ձև:

Ն. Հ.

## ՌՈՒՍ ՍՅՅԻԱԼ ՅԵՂԱՓՈՒԱԿԱՆՆԵՐԻ ԾՐԱԳԻՐԸ

Ընկերներ,

Թագակիր գլուխները սիրով խորհրդակցում  
են իրար հետ ժողովուրդի քաղաքական կապանք-  
ները պրկելու համար: Դրամատէրերը և հոյա-  
տէրերը մշտական յարաբերութեան մէջ են աշ-  
խատաւոր ժողովուրդի տնտեսական շղթաները  
զօրացնելու համար: Ի՞նչու թիւնը և շահագոր-  
ծութիւնը համատարած երեւոյթներ են և աշ-  
խարհի շորս կողմից կարմիր ձեռքերն ու քարա-  
ցած սրտերը աջակցում են իրար՝ մի անարդար  
և կործանիչ գործի համար:

Պէտք է որ բոլոր իրաւագուրկներն և քաղա-  
քակրթութեան բեռը կրողները նոյնպէս մօտե-  
նան իրար, յարաբերութեան մէջ մտնեն, խոր-  
հրդակցեն աշխարհի երեսից սրբելու համար ա-  
նարդարութիւնը և ստեղծելու համար ազատու-  
թեան, հաւասարութեան և լոյսի երկրաւոր թա-  
գաւորութիւնը: Աշխարհի բոլոր տառապողները  
պէտք է իրար ճանաչեն և աջակցեն:

Ահա թէ ինչո՞ւ՝ երբ ինձ դիմեցին գալ և ձեր  
առջև պարզել մեր ծրագիրը՝ են ուրախութեամբ  
յանձն առի: Դուք կը տեսնէք, որ աշխատաւոր  
մարդկութեան շահերը և վիճակը ամէն տեղ նը-  
ման են իրար: Մէ՛կ է ցաւը, մէ՛կ է և դարմա-  
նը: Փոխադարձաբար ճանաչե՛նք իրար և միա-  
սին դիմադրաւենք չարիքին: Կործանիչ ուժերի  
դէմ հանե՛նք աշխատանքի շինարար և կենդանի  
ոյժը:

Ընկերներ՝, մեր ծրագիրը երկու աղբիւր ու-  
նի . մարդկութեան կեանքն ընդհանրապէս և մեր  
կեանքը մասնաւորապէս : Մենք դիտած ենք  
չարունակ մարդկային հասարակութեան հոլո-  
վումը ժամանակի ընթացքում և մեր սեփական  
պատմական անցեալը : Մենք աշխատած ենք  
պարզել մեզ համար մարդկային պատմութեան  
ընթացքը, ըմբռնել ժամանակակից մարդկու-  
թեան թշուառ կացութիւնը և նրա պատճառները  
և որոշել անհատի դերը պատմութեան մէջ :

Ռուսաստանը սկսած Պետրոս Մեծի օրերից  
սերտ յարաբերութեան մէջ է մտնում եւրոպա-  
կան երկիրների հետ, որոնք այն ժամանակ շատ  
կողմերով բարձր էին մեզանից և են մինչև այ-  
սօր : Այդ քաղաքակիրթ և առաջնակարգ եր-  
կիրների հետ մեր ունեցած յարաբերութիւնը  
անօգուտ և անհետևանք չմնաց . մենք նրանցից  
շատ բան առինք . վարչական և զինւորական  
կազմ , մամուլ , գրական ձևեր . . . : Մեր բարքե-  
րը փոխւած են . մեր մտածելու և զգալու կեր-  
պերը նոյնպէս . բայց՝ փոխւած են . չեն նշնացած :

Այսպէս՝ մեր կեանքի շատ կողմերով մենք  
նման ենք եւրոպացիներին , բայց շատ ուրիշ կող-  
մերով տարբեր ենք նրանցից : Մեր ամենօրեայ ան-  
հատական կենցաղով , մեր հասարակական և պատ-  
մական կեանքով • տարբերում ենք քաղաքա-  
կիրթ միւս երկիրներից : մենք ունենք մեր առանձ-  
նաշատկութիւնները , մեր տարբերիչ գծերը :

Այս առանձնայատկութիւնների աղբիւրները  
երեք են . նախ՝ մեր պատմական անցեալը , որ  
երկար դարեր ընթացել է եւրոպական միւս եր-  
կիրների պատմութիւնից անջատ և անկախ , իր  
գրօշմը գնելով մեր ընտանեկան և ընկերական

կենցաղի վրայ : երկրորդ՝ մեր երկրի աշխարհա-  
գրական դիրքը , մեր անեզր տափաստանները ,  
հիւսիսի ճախճախուտները , մթին անտառները և  
դանդաղահոս լայն գետերը , մեր մուսլ երկինքը,  
երկար ձմեռը և դաժան սառնամանիքը : Վեր-  
ջապէս երրորդ՝ մեր պետութեան միջազգային  
դիրքը , մեր քաղաքական կարեւորութեան աստի-  
ճանը և մեր յարաբերութիւնները հարևան եր-  
կիրների հետ :

Ընկերներ՝, մեր հայեացքը մարդկային յա-  
ռաջդիմութեան մասին խորապէս տարբերում  
է ուրիշ կուսակցութիւնների հայեացքից : Մեր  
կարծիքով՝ յառաջդիմութիւնը մի յարատև կռիւ  
է , որ ունի երկու արտայայտութիւն , շատելու  
համար երկու նպատակ : Համերաշխութիւն և  
անհատի բազմակողմանի և ներդաշնակ զարգա-  
ցում — ահա այդ երկու արտայայտութիւնը :

Մարդկային պատմութիւնը իր բազմազան և  
բազմաձև կռիւներով ընթացել և ընթանում է  
այս երկու ուղղութեամբ : Պատմական բոլոր ե-  
րևոյթները կա՛մ կռիւ են անհատականութեան  
համար և կա՛մ թէ կռիւ՝ համերաշխութեան  
համար : Այս երկու տեսակ կռիւները հակառակ  
չեն միմեանց , այլ փոխադարձաբար լրացնում  
են իրար . ամէն կռիւ համերաշխութեան համար  
միևնոյն ժամանակ անհատի բազմակողմանի և  
ներդաշնակ զարգացման օգտին է և ընդհակա-  
ռակը :

Ասողներ կան , որ մարդկային պատմութեան  
ամբողջ բովանդակութիւնը կազմում են Ֆիֆայն  
դասակարգային կռիւները : Մարդկային ընկե-  
րութիւնը , ասում են նրանք , կազմւած է դասա-  
կարգերից . այս դասակարգերը հակամարտ են

իրանց շահերով. այս հակամարտութեան զարգացումը կազմում է մարդկային պատմութեան մթնոլորտը բովանդակութիւնը. անհատը կեանքի մէջ ո՛չ մի նշանակութիւն ունի:

Մենք այս տեսակէտը համարում ենք սխալ: Մենք ընդունում ենք, որ, այո՛, հասարակութիւնը կազմուած է դասակարգերից: Մենք համոզուած ենք, որ դասակարգային հակամարտութիւնը շատ մեծ դեր է խաղում կեանքի մէջ. այդ հակամարտութեամբ կարելի է մեկնել պատմական շատ երևոյթներ: Բայց միևնոյն ժամանակ մենք պնդում ենք, որ առանձին անհատները նոյնպէս դեր ունեն պատմութեան մէջ, որ գիտակից անհատը մեծ ազդեցութիւն ունի ընկերային (սոցիալական) կեանքի վրայ:

Մարդկային կեանքի ընթացքը տարրերային է այն չափով, որ չափով նա անդիտակից է և արդիւնք բնական և բնագոյնական ոյժերի: Երբ անհատների մէջ ծագում է գիտակցութեան լոյսը, այն ժամանակ նրանք կարող են ազդել կեանքի այս տարրերային հոսանքի վրայ և նրա ընթացքը փոխել իրենց կարողութեան համեմատ: Այս դերը կարող են խաղալ բոլոր գիտակից անհատները, բայց առաւելագոյնս նրանք, որոնք տողորւած են արդարութեան և ճշմարտութեան վառ սիրով: Այս վեհ գաղափարների անունով նրանք միջամտում են կեանքի տարրերային յորձանքին և ազդում նրա ուղղութեան վրայ:

Անհատը այնքան աւելի կարող է միջամտել կեանքի հոսանքին, որքան աւելի է գիտակցում իր՝ անհատական և բնութեան ոյժերին: Ճանաչելով բնութեան ոյժերը՝ անհատը կարողանում է տիրել նրանց կամ որ նոյնն է՝ կառավարել այդ

ոյժերը: Ո՛րքան աւելի խոր է ըմբռնում որևէ անհատ կամ խումբ բնութեան վարիչ ոյժերը, այնքան աւելի դիւրութիւն ունի օգտուելու նրանցից: Ո՛րքան աճում է մարդու գիտութիւնը, նոյնքան աճում է նաև նրա իշխանութիւնը բնութեան վրայ, ապա ուրեմն նաև կեանքի և նրա հոսանքի վրայ, որովհետև կեանքը բնութեան ոյժերի արտայայտութիւնն է:

Երկու ոյժ հանդիսանում են իբր խթան մարդու գիտակցութեան աճելուն և զարգանալուն. ազգաբնակչութեան աճումը և մարդկային պահանջների բազմանալը: Երբ ազգաբնակչութիւնը բազմանում և խտանում է, մարդիկ ստիպւում են միջոցներ որոնել ամէնի գոյութիւնը պահպանելու համար. երբ մարդու պահանջները բազմանում և տարատեսակ են դառնում, մարդիկ ստիպւում են նոր հնարներ որոնել այդ պահանջները գոհացնելու: Այս երկու ոյժերն են ազդելու ամէն գիտութեան և հնարամտութեան:

Ազգաբնակչութեան աճումը և նոր պահանջների երևան գալն էր, որ ստիպեց մարդկանց լեռները ծակել, դաշտերը մշակել, հեռաւոր երկիրներն իրար հետ կապել, անջատ ազգերը յարաբերութեան մէջ դնել և այս ու նման միջոցներով համերաշխութեան կապերը պրկել և անհատի բազմակողմանի զարգացմանը նպաստել: Բայց այս ամէնը հնարաւոր էր կատարել միայն այն չափով, ինչ չափով մարդկութիւնը տիրում էր բնութեան ոյժերին: Ուրեմն, առանց բնութեան ոյժերին իշխելու՝ մարդը չի կարող կեանքի հոսանքին միջամտել:

Մինչև այսօր մարդկութեան զարգացումը ընթացել է այս ճամբով. նա շարունակելու է

միևնոյն ուղին: Ազգաբնակութիւնը գնալով աճում է. մարդը աւելի խորն է ճանաչում բնութեան ոյժերը և աւելի տիրականօրէն իշխում է նրանց: Մարդկութիւնը շարունակում է հոգալ ու կարգադրել իր ապրուստի ծանր խնդիրը:

Բայց ի՞նչպէս և ի՞նչ հիմքով:

Ներկայիս՝ բուրժուական հասարակութեան մէջ մենք տեսնում ենք միմիայն անհատական և մասնաւոր տնտեսութիւններ. սրանք ապրում և զարգանում են բաժան-բաժան և շարունակ մըրցում են իրար հետ: Հասարակական տնտեսութիւնը մինչև այսօր անկերպարան վիճակ ունինա կազմակերպւած չէ. այնտեղ շի երևում գիտակցաբար մշակւած մի որոշ յատակագիծ: Ամէն տնտեսութիւն ապրում է ինքն իր համար և ջանք է թափում վնասելով միւսին՝ նրա տեղն անցնելու: Արտադրութեան միջոցները, այսինքն հողը, հանքերը, գործարաններն ու գործիքները պատկանում են մասնաւոր անհատներին կամ փոքրիկ խմբակներին: Նրանք մասնաւոր սեփականութիւն են:

Այս սակաւաթիւ բախտաւորները, իրենց ձեռքն ունենալով արտադրութեան բոլոր միջոցները, սեփականացնում են արդիւնաբերութեան ամբողջ արդիւնքը և կազմում են հսկայական դրամագլուխներ: Երկրագործը մի կողմից և գործաւորը միւս կողմից՝ չարաչար աշխատելով՝ ստեղծում են հարստութիւններ, բայց իրենց քրքրախնքի պատուը իրենք չեն վայելում. նրանք ամաման են մնում իրենց ստեղծած հարստութիւնից: Այսպիսով՝ հարստութիւնը և նրա ստեղծողները բաժանւած են իրարից:

Այս տեսակ տնտեսութիւնները, որ սովորա-

բար դրամատիրական անունն են կրում, մէկ կողմից արգելք են հանդիսանում՝ սահմանափակում են ուրիշ ձեւի տնտեսութիւնների զարգացումը, միւս կողմից եղածները խեղաթիւրում են: Իրենց գոյութեամբն իսկ նրանք չեն թոյլ տալիս, որ զարգանան աշխատանքի հաւաքական ձևերը, ուր գործաւորները պիտի կարողանային հաւասար աշխատել և հաւասար վայելել: Միւս կողմից նրանց խոչնդոտ են դառնում ընկերային (սօցիալական) խոշոր տնտեսութեան զարգացման:

Գործաւորները բաւականաչափ միջոցներ չունին, որ կարողանան անհատական տնտեսութեան դէմ մաքառել. նրանց պակասում է անհրաժեշտ դրամագլուխը: Գալով ընկերային տնտեսութեան՝ թէև ամէն կերպ ձեռնտու է հասարակութեան, որ իր տնտեսութիւնը հանրացնէ և խոշոր չափերի հասցնէ, բայց այդ բանը վնասակար է մասնաւոր սեփականատէրերի անհատական չափերին: Ահա թէ ինչո՞ւ սրանք ամէն կերպ արգելք են դառնում ընկերային տնտեսութեան զարգացման:

Այստեղ է որ հանդէս են գալիս ներկայիս մասնաւոր՝ դրամատիրական տնտեսութեան բոլոր վնասակար և կործանիչ կողմերը: Դէմ լինելով հանրային տնտեսութեան և հաւաքական աշխատանքին, տնտեսական կեանքի մէջ նրանք մըտցընում են մի տեսակ անիշխանութիւն: Նրանք հաշի չեն առնում հրապարակի պահանջը. իրար դէմ մրցելու տենչով՝ նրանք յաճախ արտադրում են պէտք եղածից աւելի ապրանք, իրար վնասելու փափագից մղւած՝ նրանք ճգնում են կործանել հակառակորդին: Այս անողոք մրցման սոսկալի հետևանքները ծայրայեղ չափեր են առնում



մանաւանդ տնտեսական տազնապնների ժամանակ :

Տնտեսական այս կարգերում մարդիկ դուր վատնում են ահագին ոյժ ու եռանդ, որ կարելի էր մարդկութեան համար շատ աւելի օգտակար ձևով գործադրել: Ինչպէս արտադրում են անհաշիւ, այնպէս էլ աշխատում են անհաշիւ: Չը նայելով որ գիտութիւնը շատ աւելի բարձր տընտեսական ձևեր է մշակել, քան մենք այսօր տեսնում ենք իրական կեանքում, բայց քանի որ գոյութիւն ունի մասնաւոր տնտեսութեանց կատարի մրցութիւնը, անկարելի է այդ բարձր և հանրօգուտ ձևերը մտցնել կեանքի մէջ:

Այնտեղ, ուր տնտեսութիւնները յարաժամ մրցում են իրար հետ, գործաւորները աշխատում են ցած օրավարձով. ու քանի որ աժան գործաւորով հնարաւոր է տնտեսութեան անկատար ձևերը պահպանել, աւելի բարձր և կատարեալ ձևերի դիմող չի լինում: Միւս կողմից տնտեսական մրցողը կարգերում միշտ հնարաւոր է սոսկական՝ անհատ արդիւնաբերողներին անուղղակի կերպով շահագործել և այս անուղղակի շահագործութիւնը՝ միացած բանւորների ուղղակի շահագործման հետ՝ անօգուտ և անշահաբեր են դարձնում տնտեսութեան լաւագոյն ձևերը, որքան էլ նրանք բարիք լինէին ցաւատանջ մարդկութեան համար:

Անհատական՝ մասնաւոր տնտեսութիւնն է ուղղակի պատճառը գործաւոր ժողովուրդի այն ծանր և թշուառ տնտեսական և բարոյական վիճակի, որի մէջ նա դեգերում է այսօր: Նրա կատարեալ անապահովութիւնը ուրիշ պատճառ չունի: Տնտեսական ահաւոր տազնապնների ուղղակի հետևանքն է անգործութիւնը. սա իր կար-

գին իջեցնում է գործաւորի առանց այն էլ ուղորմելի օրավարձը և ահա աշխատաւորը զրկւում է ոչ միայն բարոյական ու մտաւոր զարգացումից, որ չունէր արդէն, այլ և կուշտ ուտելուց:

Տնտեսութեան այս ձևը առաջ է բերում մի ահեղ և շահամոլ մրցում, ուր ամէնքը կուռւմ են ամէնքի դէմ կեանքի մէջ արտօնեալ դիրք գրաւելու համար: Այս կարգերի մէջ օրէցօր ծաւալում է դրամի ամենագոր իշխանութիւնը. ամէն ինչ դառնում է հաշւի և վաճառքի նիւթ. մեր կեանքի բոլոր բարոյական հիմունքները քայքայւում և փլոււմ են: Ամէնքը կուռւմ են ապրուստի համար, ոտի տակ տալով ամէն սրբութիւն, ամէն բարձր ու ազնիւ բան:

Սակայն դրամատիրական տնտեսութիւնը ունի նաև իր դրական կողմերը եթէ ոչ ներկայի, գոնէ ապագայի համար: Դրամատիրական տնտեսութեան ծոցում այսօր կան սաղմեր, որոնք ծլելով պիտի աճին և զարգանան և գալիք լաւագոյն տնտեսական կազմակերպութեան սիւները դառնան: Նեղ են այսօրւան տնտեսութեան սահմանները, շատ չնչին են նաև այն յարաբերութիւնները, որ առաջ են եկել մարդկային ընկերութեան զանազան խաւերի մէջ: Բայց նոյնիսկ այս նեղ շրջանակի մէջ արդէն ծնունդ են առել հաւաքական աշխատանքի ձևերը և խոշոր չափեր ունեցող տնտեսական կազմերը:

Այս նոր երևոյթների զարգացումը դեռ չա՛տ անկատար է և շատ միակողմանի. բայց նա կայ, գոյութիւն ունի և գնալով աճում է: Այստեղ ահա երևում են դրամատիրական տնտեսութեան ստեղծագործող կողմերը. այստեղ պատրաստւում

են ապագայ ընկերվարական տնտեսութեան նիւթական հիմունքներից մի քանիսը :

Աշխատաւորները համախմբուում են մեծ գործարաններում կամ խոշոր կաւածատէրերի հողերի վրայ : Գործելով միասին՝ նրանք վարժուում են հաւաքական աշխատանքի . շարունակ շփուում են իրար հետ . նրանց կարիքները և պահանջները միատեսակ են դառնում . նրանց շահերը նոյնանում են : Ստեղծուում է մի ընդհանուր գործաւորական հոգեբանութիւն, մտածելու և զգալու մի ընդհանուր եղանակ : Նրանք սովորում են հաւաքական ոյժերով մի մեծ տնտեսութիւն վարել : Այս տարրերից պիտի կազմւի ապագայ ընկերվարական հասարակութիւնը . այս հիմքերի վրայ պիտի դրւի գալիք տնտեսական հանրաշահ կազմակերպութիւնը :

Դրամատիրական տնտեսութեան շնորհիւ աշխատաւորների շահերը նոյնանալով՝ ստեղծուում է գործաւոր դասակարգի կազմակերպութիւնը այդ ընդհանուր շահերը պաշտպանելու համար : Աշխատաւոր դասակարգն իր թւով և կարեւորութեամբ դառնում է մի վիթխարի ընկերային ոյժ և հանդէս է գալիս պատմութեան մէջ իր շինարար և հանրօգուտ դերը խաղալու :

Ընկերներ, դուք տեսաք, որ դրամատիրական տնտեսութիւնն ունի իր լաւ և վատ կողմերը : Այս երկու կողմերի փոխադարձ յարաբերութիւնը ամէն երկրում և ամէն տնտեսութեան մէջ նոյնը չէ միշտ : Այն երկրներում, ուր դրամատիրական տնտեսութիւնը բարձր զարգացման աստիճանի է հասել, այնտեղ նրա լաւ կողմերը շատ են . ընդհակառակն՝ այն երկիրներում, ուր այդ տնտեսութիւնը շատ չէ զարգացած, ինչպէս

օրինակ Ռուսաստանում կամ Տաճկաստանում, այնտեղ այդ ձևի տնտեսութեան բացասական կողմերը գերակշռող են :

Գալով տնտեսութեան ճիւղերին, մենք նկատուում ենք, որ արդիւնաբերութեան բարձր տեսակներում դրամատիրական տնտեսութեան լաւ կողմերն աւելի շատ են, քան ստորին տեսակներում : Այսպէս՝ այդ տնտեսութեան վատ կողմերը խիստ աչքի են զարկում հանքարտադրութեան, առաւել ևս՝ երկրագործութեան մէջ : Բայց այդ տնտեսութիւնը իր բոլոր կործանիչ կողմերով հանդէս է դալիս մանաւանդ այն երկիրներում, որոնք համաշխարհային մրցակցութեան մէջ շատ աննպաստ դիրք ունին :

Ո՛րքան նպաստաւոր է դրամատիրական տնտեսութեան լաւ ու վատ կողմերի փոխադարձ յարաբերութիւնը, այսինքն որքան այդ տնտեսութիւնը լաւ կողմեր շատ ունի, այնքան՝ աւելի զարգացած է արդիւնաբերական պրօլետարը : Իսկ որքան զարգացած է պրօլետարը (ընչազուրկ), այնքան աւելի կարեւորութիւն է ստանում նա, համեմատած աշխատաւոր ազգաբնակչութեան միւս խաւերի հետ, որոնք նոյնպէս շահագործուում են շարաշար, ինչպէս օրինակ երկրագործներն ու մանր արհեստաւորները :

Ո՛րքան մի երկրում բազմակողմանի և հետեւողական կերպով են զարգանում բուրժուական տնտեսութեան և մասնաւոր սեփականութեան բոլոր սկզբունքները, այնքան աւելի խիստ բաժանում է նկատուում նրա ազգաբնակչութեան մէջ՝ դասակարգային տեսակէտից : Առաջ են գալիս խոշոր տնտեսութիւններ : Դրամագլուխը մեծանում է և գործի շուրջն է խմբում հազա-

րաւոր գործաւորներ: Աճում է անհատական սեփականութիւնը և հսկայական շափեր առնում: Դրամատէրերը և սեփականատէրերը օրէցօր ահագին շահեր են ստանում, իսկ բանւորները համեմատաբար միշտ աւելի պակաս վարձ են առնում:


Եւ այսպիսով՝ իսկապէս ստեղծւում է երկու ձեռք բռնակցի: Նրանցից մէկը կենդրոնացնում է իր ձեռքում գիտութիւնը, որով իշխում է բնութեան ոյժերին. նրան են պատկանում գործիքները, մեքենաները, գործարանները, երկաթուղիներն ու նաւերը—մի խօսքով որդիւնբերութեան և փոխորդութեան բոլոր ձեւերը: Իսկ միւս դասակարգը՝ աշխատաւորները, որոնք թւով անհամեմատ շատ են առաջիններից և որոնք իրենց աշխատանքով ստեղծում են հսկայական հարըստութիւններ, միշտ աւելի պակաս մասն են ըստանում իրենց արիւն-քրտինքով առաջ բերած այդ արդիւնքներից: Սրանից յետոյ շատ բնական է, որ այս երկու դասակարգերի մէջ սկսւում է մի ներքին խուլ մրցում, շահերի մի հակամարտութիւն:

Այս հակամարտութիւնը, որ սկզբում աննկատելի է շատերի համար, կամաց-կամաց մտնում է հասարակութեան գիտակցութեան մէջ: Տարրերային մղումին յաջորդում է աւելի կամ պակաս պայծառ գիտակցութիւնը: Երբեմն մութ և անլուծելի համարւած կնճիւղները պարզւում են մարդու գիտակցութեան լոյսի օգնութեամբ. և որքան տարբեր դասակարգերը պարզ և որոշ են գիտակցում իրենց փոխադարձ դիրքն ու առնչութիւնը, այնքան աւելի նրանց միջև եղած հակամարտութիւնը դառնում է բացարձակ կռիւ ու մրցում:

Սակայն ամէն մի հասարակութեան մէջ մասնաւորապէս և մարդկութեան մէջ ընդհանրապէս այս նոր, դասակարգային կուրց առաջ եղած են շատ ուրիշ կռիւներ և մրցութիւններ ուրիշ հիմունքներով, որոնք կամ գեռ չեն վերջացած բոլորովին կամ թէ նրանց կայծերը մնում են դեռ մոխրաթաղ: Այսպէս են հինաւուրց միջդասային, ցեղային, կրօնական և ազգային կռիւները իրենց դեռ չմարած հետքերով:

Դասակարգային հակամարտութիւնը, որ հասարակութեան գիտակցութեան մէջ մտնելով արտայայտւում է իբրև մի կուրցաբեր շարժում, կան ճիշդութեան, գալիս ընդհարւում է վերը յիշուած հին կռիւների հետքերին, խաչւում, խճողւում է նրանց հետ և այսպիսով իրերի տարրերային ընթացքին մէջ՝ դնալով շեշտւում է հաւաքական և նախահաշւած միջամտութիւնը: Դասակարգերը ընդհարումների և մրցումների այդ բաւիղի մէջ աշխատում են մտցնել որոշ կարգ և հետևողականութիւն:

Շահագործող դասակարգերը իրենց ընդհանուր շահերը պաշտպանելու համար կազմում են միութիւններ՝ ծնունդ են առնում հսկայական սինդիկատները և արեօստները: Յենւած այս միութիւնների վրայ, որոնք ահագին դրամական միջոցներ ունեն, շահագործողներն իրենց ձեռքն են առնում հասարակութեան արդիւնարբութեան և սպառման բոլոր պայմանները. արդիւնարբում են իրենց ուզած շափով և թելադրում են իրենց ուզած գները, որովհետև միութիւններ կազմելով՝ վերացնում են մրցումը իրենց մէջ և տէր են դառնում սպառողական հրապարակին:



Օգտուելով իրանց դրամական ոյժից և ունեցած դիրքից նրանք ձեռք են առնում նաև պետութիւնն իր բոլոր պաշտօններով և պաշտօնեաներով: Այսպիսով պետութիւնը, որ շատերի կարծիքով պէտք է հանրութեան շահերին նւիրուած լինէր, դառնում է մի որոշ դասակարգի շահերի պաշտպան և ամրացնում է այդ դասակարգի տիրապետութիւնը աշխատաւոր խաւերի վրայ:

Դրամի տէրը լինելով այդ դասակարգը դառնում է նաև կեանքի տէրը: Թէ՛ նիւթապէս և թէ՛ բարոյապէս նա ենթարկում է իրեն գիտութիւնը, որովհետև նրա նպաստով են ապրում գիտական հաստատութիւնները և գիտնականները: Արեւստը դառնում է նրա ազախինը, որովհետև նա է գնում արեւստի արտադրութիւնները և նրա ճաշակն է դեկավարում արեւստագէտներին: Վերջապէս նրան են ենթարկում գրականութիւնն ու մամուլը, որոնք հազար բերանով նկարագրում են նրա հմայքը և պաշտպանում նրա շահերը:

Բայց այս ամէնը նրանց չի գոհացնում: Ներանք թոյլ են համարում իրենց: Նրանք դիմում են ուրիշ ամարդի և կործանիչ միջոցների: Իրենց իշխանութիւնը ամուր պահելու և յարատւելու համար նրանք կապեր են հաստատում և դաշինք են կնքում հասարակութեան հինաւուրց և յետագէմ մնացորդների հետ, որոնք դեռ չեն անհետացել լիովին և միջնորդաբար վարակում են վատառողջ հովերով: Նրանք դաշնակցում են կղերական, դասային և միապետական գաղափարները դաւանողների հետ: Հետևելով «բաժանեա՛, գի տիրեսցես»-ի սկզբունքին՝ նրանք վառում են ցեղային, կրօնական և ազգային ատելութիւնները

և կրակի վրայ իւր թափելով՝ միտին ու վաւասկար կրքերը բորբոքում:

Մինչդեռ կար ժամանակ, երբ բուրժուական դասերը յառաջդիմական էին և բարերար: Այդպէս ժամանակն էր, երբ նրանք ևս իրաւագուրկ էին և տենչում էին նոյնիրաւութեան. ճգնում էին կեանքի ընթացքին մասնակից լինել իրենց նշանակութեան համեմատ: Վաղուց արդէն անցել են այն լաւ օրերը: Բուրժուական կարգերը արդէն սպառել են իրենց ամբողջ առաջդիմական բովանդակութիւնը. չկան այլևս ո՛չ վաղեմի թըռիչքը, ո՛չ լայն ու խիզախ գաղափարները: Ներանք հասել են կատարեալ այլասերման:

Ահա թէ ինչո՛ւ ամենալաւ բարոյական ու մտաւոր ոյժերը գանելով հեռանում են նրանցից: Այդ կարգերը այլևս գրաւ իչ չեն ոչ պայծառ մտքերի և ոչ էլ մաքուր խղճերի համար: Ընդհակառակն՝ այդ լաւագոյն ոյժերը օր օրի վերայ անցնում են հակառակ բանակը. այնտեղ՝ ուր իրաւագուրկներն ու շահագործւածները իրենց աղքատիկ խրճիթներում կամ մրոտ գործարաններում պատրաստում են սպազայ մարդկութեան արդար և գեղեցիկ համայնքը:

Ինքնապաշտպանութեան բնական մղումով աշխատաւոր և շահագործող դասակարգերը մօտենում են իրար, ձեռք ձեռքի տալիս և միասին դիմում են ինքնապաշտպանութեան: Ո՛րքան աշխատաւոր խաւերը գիտակցում են իրերի ընթացքը, իրենց անմխիթար և իրաւագուրկ կացութիւնն ու թշուառ վիճակը, այնքան աւելի ծաւալում է նրանց միութիւնը:

Ո՛րքան այդ փրկարար գիտակցութիւնը առաջ է գնում, այնքան քշանում են մասնակի ընդհա-

րումները և վաղանցուկ, արտաքին երևոյթների դէմ մղւած կռիւները: Սրանց տեղ առաջ է գալիս մի կազմակերպւած, խելացի և ահաւոր պայքար: Եւ արդէն պայքարում, կուռում են ոչ թէ այս կամ այն մասնաւոր դէպքի դէմ, այլ ճնշման և հարստահարութեան, բռնութեան և շահագործումի բուն իսկ հիմքերի դէմ: Այս կռիւը շատ աւելի կատաղի է և զօրաւոր, որովհետեւ նա մղւում է աշխատաւոր դասակարգի տնտեսական, քաղաքական և հոգեկան ազատագրութեան համար: Աշխատաւորը չունի կուշտ հաց և կարգին բնակարան, նա չունի քաղաքական իրաւունքներ և իր թշուառութեան մէջ խաւար է և տգէտ. նա բարձրացնում է իր ահարկու մուրճը փշրելու համար այս երրեակ շղթան:

Ինչպէս կենսական ամէն մեծ շարժում՝ աշխատաւոր ժողովուրդի այս ազատագրական շարժումն ևս ունի իր արտայայտութիւնը. միջազգային յեղափոխական ընկերակարանութիւնը սրա ամենահետեւողական արտայայտութիւնն է, սրա գիտական լուսաբանութիւնը և ընդհանրացումն է միանգամայն:

Ընկերներէ՛ր, ամէն շարժում՝ փոքր չափերով է սկսուում և եթէ կենսունակ է՝ մեծանում է և լայն չափերի է հասնում: Այսօր ընկերակարան հոսանքը լայն ծաւալ ունի. նա ցանցել է ամբողջ աշխարհը, ամէն տեղ, ուր կայ բռնութիւն և շահագործում՝ հնչում է նրա աւետաբեր ձայնը: Բայց շատ ժամանակ չէ անցել այն օրից, երբ նա գիտակից յեղափոխական փոքրամասնութեան աշխարհահայեացքն էր միայն:

Անցան տարիներ. գերմարդկային ճիգերով այս լուսաւոր գաղափարները տարածւեցին, մը-

տան ժողովրդական խուռն երամների մէջ, դարձան նրանց մի սուար մասի գիտակցութիւնը և այսօր մենք հասել ենք այնտեղ, որ թէ՛, արդիւնաբերական կեդրոնների պրօլետարը և թէ՛ աշխատաւոր գիւղացին գիտակցում են արդէն, որ իրենք իսկապէս կազմում են մի մեծ դասակարգ, բանւորական մի վիթխարի բանակ:

Այսօր իրենց փրկութեան գրաւականը տեսնում են իրենց դասակարգային միութեան մէջ և արդէն իրենց բոլոր տեղական, մասնաւոր և առժամեայ շահերը մի անօրինակ անձնւթութեամբ ստորադասում են մի շատ մեծ ու վսեմ նպատակի՝ աշխարհի սօցիալ-յեղափոխական յեղաշրջման:

Բայց ո՞րն է այդ յեղաշրջման ծրագիրը. ի՞նչ է աշխատաւոր խաւերի տենչանքը:

Վեհ է այդ ծրագիրը և պարզ միանգամայն: Նրանք ձգտում են համայնացնել աշխատանքը, սեփականութիւնը և անտեսութիւնը. նրանց տենչանքն է, որ ամէնքը աշխատեն միասին, ամէն հարստութիւն պատկանէ ամէնքին և ամէն անտեսութիւն ընդհանուրինը լինի:

Նրանք պահանջում են, որ մասնաւոր սեփականութիւնը վերանայ աշխարհից. նրա հետ կը չքանան նաև բոլոր դասակարգերը: Ունեցող-չունեցողներն են, որ կազմում են այսօրւան անարդար հասարակութիւնը և անհաւասար դասակարգերը: Անհատական՝ մասնաւոր սեփականութեան չքացումով հասարակութիւնը արեւօրէն և իրօրէն միապաղաղ կը դառնայ:

Այսօրւան պետութիւնները որոշ դասակարգերի շահեր են պաշտպանում միայն. նրանք ըստիպողական և բռնադատող ընդթ ունին, որով-

հետև բռնութեամբ և ստիպումով միայն մարդկանց մի շնչին փոքրամասնութիւն տիրում և հարստահարում է ժողովրդական հսկայ զանգւածներին, խլում է նրանց աշխատանքի արդար արդիւնքը:

Ընկերվարականները պահանջում են, որ պետութիւնը դադարէ բռնութեան և դասակարգային տիրապետութեան գործիք լինելուց: Պետութիւնը շատ աւելի բարձր նպատակ ունի. նրա պաշտօնն է սատար լինել քաղաքակրթութեան. և իր այս բարձր պաշտօնը, որ իր խկական կոչումն է միանգամայն, նա կարող է կատարել՝ կազմակերպելով ընդհանուր աշխատանքը յօգուտ ընդհանրութեան:

Այս ծրագրի իրագործութիւնը աշխատաւոր ժողովուրդին կը տայ բարեկեցութիւն և ազատութիւն:

Հասարակական հարստութիւնը ընդհանուր առմամբ գնալով աճում է շարունակ, բայց գորուստ երկիրներում մարդիկ յաճախ մեռնում են քաղցից և չքաւորութեան մէջ: Հարստութիւնը այսօր հարստահարութեան և կախման աղբիւր է: Նա պատկանում է ո՛չ թէ ամէնքին, այլ մի շնչին փոքրամասնութեան: Աշխատաւորութեան հսկայ զանգւածը կախած է այդ փոքրամասնութիւնից, որովհետև նրանից է գործ ստանում և օրավարձ՝ ապրելու համար: Աշխատաւորի այս նեղ կացութիւնից օգուտելով՝ փոքրամասնութիւնը շարաշար նեղում և հարստահարում է Քրտանաթոր գործաւորին և հողագործին:

Մենչդեռ եթէ հարստութիւնը համայնացած լինէր, եթէ բոլոր հարստութիւնը պատկանէր

ամենքին, այն ժամանակ որքան մի հասարակութիւն հարստանար, այնքան նրա ամէն մէկ անդամը կը հարստանար, որքան մի հասարակութիւն բարեկեցիկ լինէր, այնքան նրա ամէն մէկ անդամը գոհ կը լինէր: Ապահովելով իր սպրուտը սեփական աշխատանքով և ամէնքի աջակցութեամբ, մարդս իրեն շատ աւելի ազատ կը զգար, առանց կախումի, իբրև համայնքի և պետութեան հաւատար անդամ:

Ո՛րքան տաղանդներ կորչում են անյայտութեան մէջ՝ դուր և անօգուտ, միայն, նրա համար, որ միջոց չունեն իրենց բնատուր ընդունակութիւնները զարգացնելու յօգուտ ընդհանրութեան: Ուսում և գիտութիւն, արւեստ և գեղարւեստ ունեւորին են միայն մատչելի:

Ո՛րքան ոյժեր կորչում են անհետ, որովհետև կեանքի դաժան պայմանները նրանց մղում են անյարմար միջավայրեր, ուր նրանք կատարում են գործեր, որոնց կոչումը չունին: Մարդանհատը, որ սքանչելի ընդունակութիւններով օժտւած մի արարած է, ժամանակակից անարդար և անմիտ կարգերի մէջ անկարող է զօրացնել իր բոլոր բարձր ընդունակութիւնները և ոյժերը: Նա այրասերում և փշանում է կեանքի պղտոր և անողոք յորձանքում:

Մարդկանց մի մասը, չահագործելով աշխատաւոր ժողովուրդի լայնածառալ զանգւածները, ստաւոր ժողովուրդի լայնածառալ զանգւածները, ինչպիսնում է վայելքից և անգործութիւնից: Ընտեղծւում են անբնական ճաշակներ, անվայել կիրքեր և ամօթարեր հակումներ. ստորին կարգի բնազդները արտայայտւում են անսանձ և անարգել իրենց գարշելի մերկութեամբ և իջնելով վարի խաւերը, վարակում են ամէն առողջ միջնորդ:

Փոխադարձաբար հասարակութեան վարի խաւերը բթանում են շարքաշ ու երկարատե մարմնական աշխատանքից: Սաւարի և տգիտութեան մէջ ծաղկում են ամէն կարգի մոլութիւններ: Ամենատարրական պահանջներն անգամ գոհացում չեն գտնում և թշուառ մարդկութեան մի խոշոր հատածը այս նեղ ու խեղդող կացութիւնից դուրս գալու համար՝ երկու անպատիւ և կործանիչ դուռն ունի միայն — յանցանքը և անառակութիւնը:

Մինչդեռ ընկերվարական կարգերը վերջ կը տային թէ՛ մարդու այս անվայել վիճակին և թէ՛ վնասաբեր անհաւասարութեան: Համերաշխութեան թեւերի տակ խելացի և արդար կազմակերպութիւն կը ստանար մարդկային աշխատանքն ու բարօրութիւնը: Այս նոր պայմանների մէջ մարդ-անհատն այլևս ստիպւած չէր լինի այլասերելու և փշանալու անգործութիւնից կամ շարքաշ աշխատանքից:

Միայն այս պայմանների մէջ մարդկային անհատը կարող է բազմակողմանի և ներդաշնակ զարգանալ: Մարդը այլևս չի նեղւիլ քաղցից կամ ցրտից և նրա բոլոր ոգեկան ոյժերը անարգել թռիչք կը ստանան: Այս կարգերի մէջ միայն երևան կը դայ մարդու բովանդակ ոյժն ու կարողութիւնը յօգուտ ընդհանրութեան:

Այս տեսակէտից նայելով՝ ընկերվար-յեղափոխականութեան գործը ամբողջ մարդկութեան ազատագրութեան գործն է: Այսպիսով ո՛չ միայն աշխատաւոր դասակարգն է որ պիտի փրկւի, այլև համայն մարդկութիւնը:

Երբ վերանան դասակարգերը և անհաւասարութիւնը, կը վերանան նաև ամէն կարգի կռիւ-

ները մարդկութեան միջից և կը շքանան բռնութեան և շահագործման այն բոլոր ձևերը, որ մարդիկ ստեղծել են իրենց նման մարդկանց տիրելու համար: Այլևս մէկը միւսին չի շահագործի, ամէնքը վիճակակից և բախտակից կը լինեն և կը բարձրանան հաւասարապէս:

Այս նպատակին հասնելու համար յեղափոխական-ընկերվարականութիւնը աշխատում է օգտւել երկու նպատաւոր պայմաններից: Առաջինը մարդկութեան տնտեսական զարգացման դրական կողմերն են. մենք տեսանք, որ այսօր դրական կողմեր ունի, որոնք գնահատելի են ապագայ մարդկութեան նորաստեղծ կեանքի համար: Երկրորդը՝ բանւոր զանգւածների ստեղծագործական ընդունակութիւնն է. ժողովուրդը, կամ որ նոյնն է՝ աշխատաւոր խաւերը ընդունակ են բեղմնաւոր և ստեղծագործող աշխատանքի. պատմական և առօրեայ փորձը ցոյց է տալիս, որ նրանք կարող են կենցաղի նոր և կատարեալ ձևեր յղանայ և իրագործել:

Ահա թէ ի՛նչ բարձր մտքեր, աջնիւ տենչեր և լայն ծրագիրներ են զբաղեցնում այսօր ամբողջ աշխարհի ընկերվարականներին: Ամենքն իրենց երկրի մէջ, իրենց ժողովուրդին մայրենի լեզուով քարոզում և մեկնում են այս գաղափարները, ներարկում են այս գգացումներն ու տենչերը և կազմում են մի հսկայ բանակ՝ ապագայ սրբազան և վերջնական պատերազմի համար:

Մենք, ուրս ընկերվարականներս, մեզ նկատում ենք իբրև այս մեծ բանակի զօրամասերի միինը: Ճգնում ենք մեր գործունէութիւնը այսպէս վարել, որ չհակասէ և չվնասէ միջազգային

ընկերվարութեան շահերին: Մենք գործում ենք միևնոյն ուղղութեամբ, միևնոյն ոգով, միևնոյն նպատակների համար, բայց մեր գործունէութեան ձևերը տարբեր են, որովհետև տարբեր է ա՛յն միջավայրը, ուր գործում ենք, և այն պայմանները, որոնց մէջ կուուում ենք: Մենք հարւածում ենք միևնոյն կէտին, բայց տարբեր ձեւով:

Ընկերներ. մինչև այստեղ ես աշխատեցի պարզել ձեր առաջ մեր հայեացքը մարդկութեան զարգացման վրայ ընդհանրապէս. դուք լսեցիք մեր կարծիքը անցեալի մասին և մեր յոյսերը՝ ապագայի համար: Այժմ ես կը դառնամ Ռուսաստանին մասնաւորապէս:

Գրամատիրական տնտեսութեան ձևերը արդէն մտել են Ռուսաստան: Ինչպէս ամէն տեղ, այնպէս էլ մեր երկրում տնտեսութեան այդ ձևերը հանդէս է գալիս իր երկու կողմերով, որոնք նման չեն իրար: Մի կողմից մենք նկատում ենք այդ տնտեսութեան առաջադէմ և ստեղծագործող կողմերը, որոնք պատմական ապագայ ունին. միւս կողմից նրա մութ ու կործանիչ կողմերը, որոնք դատապարտւած են ոչնչանալու:

Բանւորական խաւերի շահերի տեսակէտից գրամատիրական տնտեսութեան այս երկու կողմերը շփաղանջ աննպաստ համեմատութիւններ ունին. փաստակար ու մութ կողմերը շատ աւելի են, քան օգտակար և լուսաւոր կողմերը: Այս երևոյթը մեր ընկերական զարգացման յատկորոշ գծերից մէկն է:

Գրամատիրական տնտեսութեան զարգացման

հետ կապւած են մի շարք տաղնապներ: Եւրօպական բոլոր երկիրները կրած են այդ տաղնապները, բայց երկար ժամանակի ընթացքում, դանդաղօրէն և որոշ կարգով: Այս կողմից մեր երկիրը խիստ աննպաստ վիճակի մէջ է: Մեր քաղաքակրթութեան մակարդակը շատ ստոր է. զաքակրթութեան մնացել Եւրօպայից թէ՛ մեր կրթմենք յետ ենք մնացել Եւրօպայից թէ՛ մեր կրթութեամբ և թէ՛ մեր կառավարական կազմով: Եւ գարգացման այս ստոր աստիճանի վրայ մեր ժողովուրդը կրում է դրամատիրական նոր կարգերի բոլոր փաստակար հետևանքները շատ կարճ ժամանակում և ամփոփ՝ կուտակւած ձևով: Մենք տնտեսապէս ապրում, գարգանում և տառապում ենք արագ. դեռ չյարմարւած տնտեսական զարգացման նոր պայմաններին, վրայ են հասնում աւելի նորերը: Այս ամէնը սուր կերպարանք է տալիս ընկերային (սօցիալական) հարցին՝ մեր երկրում:

Նա սրւում է նաև հետևեալ պատճառներով: Մեր երկրում մարդուն շահագործում են ամենանախնական և բիրտ ձևերով. միւս կողմից դեռ կանգուն է հինաւուրց միապետութիւնը, որ յենուում է մի կողմից հողատէր ազնւականութեան, միւս կողմից հլու պաշտօնէութեան վրայ: Այս յետադէմ և վայրագ կառավարութիւնը շփաղանջանք դանդաղ է փոխում իր վարչական ձևերը, որովհետև բիրտ շահագործումը շատ լուսարմարում է վայրագ ինքնակալութեան և երկուսը դաշնակցած իրար՝ խեղդում են ուսու կեանքի բոլոր յառաջադէմ արտայայտութիւնները:

Մինչդեռ այս խաւար ուժերի կողքին արդէն գոյութիւն ունի մի բազմամարդ մտաւորական դասակարգ, որ սողորւած է ընկերվարական գա-



դափարներով: Այս ոյժը շատ նոր է համեմատած իր մրցորդների հետ. անխիղճ շահագործութիւնը և վաղեմի ինքնակալութիւնը խոր պատմական անցեալ ունին. փոխադարձաբար թարմ մտաւորականութիւնը հարուստ է եւրոպական ընկերների ընկերվար կուսակցութիւնների պատմական փորձով: Այս երկու ծայրայեղորէն հակադիր ուժերը շատ սուր կերպարանք են տալիս թէ՛ ընկերային (սոցիալական) հարցի դրեւելուն և թէ՛ մաքառումի և կոււի ձևերին մեր երկրում:

Ռուս գիւղի արդիւնաբերութեան ուժերը սպառուած չեն թէև, բայց ջլատուած են արդէն: Սրա պատճառը նախ բիւրօկրատ պետութեան վարչական յորինւածքի հսկայական զարգացումն է. նա սպանել է ամէն ինքնագործութիւն և նախաձեռնութիւն. հազար ձեռքով նա սեղմում է գիւղացու կոկորդը: Յետոյ գալիս են այն պայմանները, որոնց մէջ ռուս գիւղացին յիսուն տարի առաջ ազատուեց ճորտութիւնից. նա ստացաւ շատ վատ հող և շատ փոքր չափով. նա պարտաւոր էր յետ գնել իր շնչին հողաբաժինը և վճարել մեծ քանակութեամբ տուրքեր: Վերջապէս երրորդ պատճառն է վաշխառութեան բոլոր ձևերի և տեսակների լայնածաւալ զարգացումը:

Աշխատաւոր գիւղացին իր շնչին և ուժասպառ հողաբաժնից չի կարողանում իր ընտանիքի ապրուստը հանել. նա օրէցօր մեծ խմբերով դիմում է կողմնակի աշխատանքներին, որ մի կերպ կարողանայ իր ողորմելի գոյութիւնը պահպանել և ծանր տուրքերը վճարել. նա դառնում է վարձուոր այս կամ այն աղայի մօտ և իր բազմավաստակ ու շարքաշ աշխատանքի փոխարէն

ստանում է մի շնչին եկամուտ, որ հազիւ հաւասարում է քաղաքների թշուառ ընչազուրկի աղքատիկ օրավարձին:

Այսպիսով մեր ժողովուրդի հսկայ մեծամասնութիւնը՝ քաղաքների գործաւորը և աշխատաւոր գիւղացին՝ շափազանց շնչին եկամուտ ունենալով՝ շատ քիչ բան կարող են սպառել մեր արդիւնաբերութեան արտադրութիւնից: Մեր ներքին շուկան գնալով փոքրանում և նեղանում է: Մենք չունենք գաղութներ, ուր սպառէինք մեր ապրանքները. նրանք պէտք է ծախւին միմիայն մեր երկրի մէջ, իսկ սպառողը ժողովուրդն է, որ չքաւոր լինելով՝ գնել չի կարող: Այսպիսով մեր տնտեսութիւնը տառապում է թէ՛ ներքուստ և թէ՛ արտաքուստ:

Մեր երկրի ազգաբնակչութիւնը օրէցօր աճում, բազմանում է. դուզընթացաբար շատանում է գործազուրկ աշխատաւորների թիւը: Ստեղծուում է գործաւորների մի սոււար պահեստի բանակ, որ ապրուստի համար դուրս է գալիս մրցութեան և գրանով իջեցնում բանւորների առանց այն էլ ողորմելի օրավարձը: Աշխատաւոր գառակարգերը մի կողմից մղւած իրենց անմիջական կարիքներից, միւս կողմից ընկերվար մտաւորականութեան ազդեցութեան տակ՝ մըտնում են կոււի ասպարէզ ժամանակակից լուսգոյն պահանջներով: Եւ այս շարժումը կատարուում է մի երկրում, ուր մինչև այսօր իշխում են նահապետական և ոստիկանական դաժան կարգերը:

Այս կարգերը մինչև այսօր ճնշել և ճնշում են ամէն անհատական և հաւաքական նախաձեռնութիւն և այս ճնշումը համարում են իրենց

գոյութեան պայմանն ու հիմքը: Մեր երկրի խոշոր արդիւնաբերական և առևտրական դասակարգը, որ մեղանում շատ աւելի յետագէմ է, քան որևէ ուրիշ տեղ, տեսնելով աշխատաւորութեան ընդդիմադիր բանակը, որ կազմակերպւում է սպառնալից, օրէցօր աւելի կարիք է ըզգում դաշնակցելու ինքնակալութեան հետ՝ ընդդէմ արթնացող գործաւորի:

Միւս կողմից հողատէր ազնւականները և գիւղական ամէն կարգի վաշխառուները նոյն տեսակ սրտակից համերաշխութեան կարիք են ըզգում՝ ընդդէմ գիւղական աշխատաւոր զանգւածների, որոնք ոտքի են ելնում «հողի և ազատութեան» անունով:

Միապետութիւնը և նրա պաշտպաններն ու հաւատարիմ դաշնակիցները՝ պաշտօնէութիւնը, հոգևորականութիւնը (կղերականութիւնը), հողատէր ազնւականը, խոշոր դրամատէրն ու գիւղի վաշխառուն՝ նկատելով խոնարհ խաւերից եկող վտանգը՝ դիմում են ինքնապաշտպանութեան ամէն միջոցի:

Նրանք աւելի և աւելի ճնշում են այն մանր ազգութիւնները, որոնց նւաճել է կայսերական Ռուսաստանը, ցանում են լիարունակ ազգային, կրօնական և ցեղային հակամարտութեան և թըշնամութեան սերմեր: Այսպիսով նրանք արգելք են դառնում, որ բոլոր ազգերի աշխատաւոր խաւերը գիտակցեն իրենց ընդհանուր թշւառութիւնը, միանան և կուրս դուրս գան իրենց ընդհանուր թշնամու դէմ:

Այս կարգերը հակասում են մեր երկրի թէ՛ տնտեսական, թէ՛ կենսակրթական (կուլտուրական) և թէ՛ քաղաքական-ընկերային արգասաւոր գար-

դացման և այս հակասութիւնը զնալով միշտ աւելի սուր կերպարանք է ստանում:

Ահա այսպէս, ընկերներ, ուսու ինքնակալութիւնը մեր երկրում ամէն տեսակ մակարոյժ տարրերի համար հանդիսանում է իբրև մի զօրեղ և յուսալի յենարան. ամէն կարգի բռնաւորներ և շահագործողներ որոնում են նրա հովանին և եռանդով պաշտպանում են նրա հմայքը:

Այսպէս է նա մեր երկրում: Իսկ մեր երկրից դուրս նա նոյնքան աղէտաւոր է մարդկութեան համար և խաղում է մի ստոր դեր: Իր զօրեղ ժամանակ նա միշտ եղել է եւրօպական յետագիմութեան ամենամեծ և անառիկ բերդն ու մարտկոցը: Լուսաւոր երկիրների բանւորական կուսակցութիւնների, նրանց վարած ազատագրական պայքարի և կուրսի համար նա միշտ հանգէս է եկել իբրև ամենաահաւոր սպառնալիքը:

Նա կասեցնում է միջազգային յառաջդիմութեան ընթացքը, նա թումբ է կանգնեցնում նրա փրկարար հոսանքի առաջ. ուստի այդ բռնապետութեան ոչնչացումը ո՛չ միայն բարիք կը լինէր մեր երկրի համար, այլև բովանդակ մարդկութեան համար:

Սակայն որոնք են ուսու ազգի այն խաւերը, որոնք կուրս են մղում ինքնակալութեան և նրա բռնաւոր կարգերի դէմ: Մեղանում կայ մի սոււար ընդդիմադրական խումբ, որ դասակարգային տեսակէտից շատ անորոշ է, որովհետև այնտեղ մտնում են մեր ազգի ամէն խաւերից ելած անհատներ: Այս խումբը տողորւած է ազատամիտ և ռամկավար տենչերով. «կիրթ հասարակութիւն» կոչւած է այս խումբը, որ սակայն ժողովրդական զանգւածներ չունի իրեն հե-

տեւող. նա մենակ է: Այսպիսով ինքնակալութեան դէմ մղող պայքարի բովանդակ ծանրութիւնը ընկնում է գործաւորի, աշխատաւոր գիւղականի և ընկերվար-յեղափոխական մտաւորականութեան վրայ:

Նկատելով ուրեմն, որ աշխատաւոր տարրերն են իսկական մարտնչողներն ու ռազմիկները այս մեծ ազատամարտում, մեր կուսակցութեան համար անհրաժեշտ է դառնում յեղափոխութեան գերագոյն վայրկեանին ամէն ճիգ թափել լայնացնելու և խորացնելու այն բոլոր ընկերային (սօցիալական) և կայքատիրական փոփոխութիւնները, որոնք կապւած պիտի լինեն ինքնակալութեան տապալման հետ:

Այս աղէտաւոր կարգերի վերացման սրբազան ժամին պէտք է փոփոխեն նաև դասակարգերի փոխադարձ յարաբերութիւնները և սեփականութեան ձևերը: Կուսակցութեան գերագոյն պարտականութիւնն է ամէն կերպ ջանալ, որ ձեռք բերած փոփոխութիւնները որքան կարելի է նըպաստաւոր լինեն աշխատաւոր խաւերին:

Յեղաշրջման այս խորացումն ու լայնացումը անհրաժեշտ է նաև մի ուրիշ նկատումով: Քաղաքական և տնտեսական տազնաւոյնները անխղճի կապերով շղթայւած են իրար: Աշխատաւոր ժողովուրդը ձգտում է ստեղծել ո՛չ միայն լաւագոյն քաղաքական կարգեր, այլև լաւագոյն տնտեսական յարաբերութիւններ, որովհետև նա ճնշւած է թէ՛ բռնակալութեան և թէ՛ դրամատիրութեան և թէ՛ խոշոր հողատիրութեան ձեռքին: Ու երբ խորտակւում են քաղաքական հին կարգերը, ամենանպաստաւոր ժամն է նաև տնտեսական կարգերն այնպէս փոխելու, որ յեղա-

փոխութեան իսկական մարտիկները ամենալաւ և ամենալայն չափով օգտուին:

Մեր ծրագիրը ամբողջովին կարող է իրականանալ միմիայն մի պայմանով. յեղափոխութեան ժամանակ աշխատաւոր դասակարգը պէտք է կատարեալ յաղթութիւն տանէ: Դրամատիրական բովանդակ սեփականութիւնն արտագրաւել, հասարակական տնտեսութիւնն հիմնովին վերակազմել և ամբողջ ընկերային կազմը ընկերվարական նոր ու հաստատուն հիմքի վրայ դնել — այս է մեր ծրագրի ամբողջական իրականացումը: Այս նպատակին հասնելու համար աշխատաւոր դասակարգն ամբողջովին պէտք է կազմակերպւի իբր մի հսկայական և լայնասփիւռ ընկերվարական կուսակցութիւն: Նա պէտք է միահամուռ և ներդաշնակ ոյժերով առաջ վարէ իր սրբազան պատերազմը և եթէ հարկը պահանջէ՝ նա, մեր ծրագրին համաձայն՝ կարող է ստեղծել բանւոր դասակարգի ժամանակաւոր իշխանապետութիւն (դիկտատուրա):

Բայց այդ ցանկալի օրը դեռ շատ հեռու է: Այսօր բանւոր դասակարգը դեռ չէ կազմակերպւած լիովին: Իր թւով նա մարդկութեան հսկայ մեծամասնութիւնն է. բայց կազմակերպւած բանւորութիւնը մի փոքրամասնութիւն է առայժմ: Իբրև փոքրամասնութիւն՝ նա կարող է միայն մասնակի ազդեցութիւն ունենալ ներկայիս հասարակական կազմի փոփոխութեան և օրէնսդրութեան ընթացքի վրայ:

Այս մասնակի կռիւների և ընդհարումների ժամանակ հնարաւոր է երկու վերաբերում դէպի մարդկութեան յեղաշրջման գործը:

ձեռք բերել մասնաւոր գիշումներ և փոփոխութեան ենթարկել Հասարակական կազմի այս կամ մասը, պայքարող կուսակցութիւնները յաճախ մոռանում են շարժման վերջնական նպատակը և անձնատուր են լինում ընթացիկ պայքարին: Այսպէս՝ ջանալով ձեռք բերել ութ ժամեայ բանւորական օր, յաճախ մոռանում են, որ մեր նըպատակը ոչ թէ ութ ժամեայ բանւորական օրն է, այլ ընկերվարական կարգերի վերջնական յաղթանակը: Միջոցը համարում է նպատակ և կանցնում է աշխատաւոր դասակարգի յառաջընթացութիւնը:

Մեր կուսակցութիւնը ուրիշ վերաբերում ունի այս հարցի հանդէպ: Մենք աշխատում ենք միշտ վառ պահել աշխատաւոր դասակարգի գիտակցութիւնը և ջանում ենք այնպէս վարել մեր դործունէութիւնը, որ մասնաւոր գիշումների և կռիւների քաղաքականութիւնը չծածկէ բանւոր դասակարգի աչքերից մեր և նրա մղած կուր վերջնական նպատակը՝ ընկերվարութիւնը:

Հիմա հարց է թէ ի՞նչ տեսակ մասնաւոր գիշումներ պէտք է կորզել ժամանակակից կարգերից: Այս մասին մեր տեսակէտը շատ որոշ է: Ամէն գիշողութիւն համարժէք չէ մեզ համար: Մենք պէտք է աշխատենք ձեռք բերել այն տեսակ գիշումներ, որոնք ընդունակ լինեն բանւոր դասակարգը ամէն կողմով զօրացնելու: Մեր ձեռք բերած փոփոխութիւնները պէտք է նպատեն աշխատաւոր դասակարգի խմբումին և սերտ միութեան, պէտք է մարզեն նրա ազատարար կռիւը մղելու ընդունակութիւնները, պէտք է ստարեն նրա մտաւոր զարգացման, բազմացնեն և բարձրացնեն նրա կիրթ պահանջները, ամրա-

ցընեն նրա ռազմական դիրքերը և հեռացնեն այն բոլոր խոչնդոտները, որոնք արգելք են դառնում աշխատաւոր խաւերին կազմակերպւելու և մի հոծ ու ահաւոր բանակ կազմելու:

Այս է մեր կարծիքը Ռուսաստանի ներկայ վիճակի և ազատագրական կուր պայմանների մասին:

\* \* \*

Ընկերներ. Հիմք տունելով վերը յիշատակած բոլոր նկատումները, մեր կուսակցութիւնը ամէն կերպ ջանալու է պաշտպանել, ոյժ տալ կամ իր յեղափոխական կուրով կորզել հակառակորդ բանակից հետեւեալ տնտեսական և քաղաքական փոփոխութիւնները. —

ՔՄԱՍՔԱՅԱՆ և ԻՐԱՆԱԿԱՆ ՓՈՓՈՅՈՒԹԻՒՆՆԵՐ: — Անհատը իբրև մարդ և իբրև որոշ երկրի քաղաքացի՝ մի շարք անբռնաբարելի իրաւունքներ ունի, որոնք ընդունւած են եւրօպական շատ երկիրներում և մենք պահանջում ենք, որ մեր երկրում ևս ճանաչեն: Սրանք են՝ խղճի, խօսքի, մամուլի, ժողովների և միութիւնների կատարեալ ազատութիւնը:

Ամէն մարդ պէտք է կատարեալ ազատութիւն ունենայ դաւանելու այն կրօնը կամ կարծիքը, որ ինքը ճշմարտութիւն է համարում, առանց բռնանալու ուրիշի դաւանանքի վրայ: Նա պէտք է կարողանայ ազատ և անկաշկանդ մտածել և խորհիլ և իր միտքը, կարծիքը կամ համոզումը ազատ և աներկիւղ քարոզել և տարածել թէ՛ բերանացի, թէ՛ գրաւոր, թէ՛ մասնաւոր շրջաններում և թէ՛ հրատարակներում:

Ինչպէս անհատը, այնպէս էլ խմբերը պէտք

է ազատ լինեն իրենց միտքը, զգացումն ու համոզումը արտայայտելու մամուլի և գրականութեան մէջ՝ ընկերական, կրօնական և գիտական ամէն կարգի նիւթերի մասին, առանց վախենալու բանտից, քսորից կամ պետական ուրիշ կարգի պատուհասներէից:

Մարդիկ պէտք է բողոքովին ազատ լինեն հաւաքուելու միատեղ ե՛րբ և ի՛նչ նպատակով էլ ուզեն և ո՛րտեղ էլ ցանկանան. նրանք պէտք է կարողանան խմբուել թէ՛ որոշումներ կայացնելու, թէ՛ կարծիքներ փոխանակելու, թէ՛ գաղափարներ տարածելու և թէ՛ իրենց գայրոյթը յայտնելու այս կամ այն երեւոյթի առիթով:

Վերջապէս մարդիկ պէտք է ազատ լինեն ամէն տեսակ միութիւններ կազմելու՝ գիտական, արեստական, գրական, սպառողական, արդիւնաբերական և այլն:

Մարդիկ պէտք է ազատ լինեն տեղափոխուելու մի երկրից միւսը կամ երկրի մի կողմից միւսը, նայած իրենց կարիքներին և յարմարութեան. անցազրեքը և նրնաց հետ կապած բոլոր ձեւականութիւնները պէտք է վերացնեն: Ամէն մարդ պէտք է ազատ լինի նաև իր պարապմունքների ընտրութեան մէջ. պէտք է կարողանայ ի՛ր նախընտրած գործով զբաղիլ:

Մարդիկ պէտք է իրաւունք ունենան հաւաքաբար մերժումներ անելու, հաւաքաբար շաշխատելու՝ եթէ պայմանները ձեռնտու չեն, որ ասել է՝ գործադուլների կատարեալ ազատութիւն պէտք է լինի և գինեալ կամ ուրիշ կարգի միջամտութիւնները պէտք է արգիւլեն:

Պէտք է թագաւորէ անձի և բնակարանի անձեռնմխելիութիւն. կասկածով մարդիկ ձերբա-

կալելը, նրանց երկար ժամանակ առանց դատի և քննութեան բանտերում պահելը, ուզած ժամանակ մարդու տունը մտնելն ու խուզարկելը իսպառ պէտք է վերանան:

Պետական իշխանութիւնը, որ այսօր կեդրոնացած է ինքնակալի և իր ստոր բարեկամների ձեռքում, պէտք է անցնի ժողովրդի ընտրած մարդկանց ձեռքը: Եւ որովհետև թէ՛ պատերազմը և թէ՛ խաղաղութիւնը, թէ՛ քրէական և թէ՛ քաղաքացիական օրէնքները, թէ՛ հարկերը և թէ՛ մաքսերը. մի խօսքով՝ ամբողջ պետութեան կեանքը ազդում են այս կամ այն ձևով՝ ամէնքի վրայ, ուստի և ամէնքը պէտք է մասնակցեն պետական ընդհանուր կեանքին՝ իրենց ընտրեալների միջոցով: Ամէն ոք, որ 20 տարեկան է արդէն, լինի նա ռուս թէ՛ հայ, քրիստոնէայ թէ՛ այլադաւան, այր թէ՛ կին՝ իրաւունք պիտի ունենայ մասնակցելու պետական պաշտօնեաների ընտրութեան և ի հարկին՝ ինքն ընտրուելու:

Բւէարկութիւնը պէտք է գաղտնի կատարուի, որպէսզի ամէն մարդ ազատօրէն իր քէն տայ ցանկացած մարդուն, առանց քաշուելու կամ վախենալու որևէ խմբից կամ անհատից: Ընտրութիւնները պէտք է լինեն ուղղակի, այսինքն ամէն պաշտօնատար անձնաւորութիւն պէտք է ուղղակի ժողովրդի կողմից ընտրուի և ո՛չ թէ ինչպէս լինում է յաճախ՝ ժողովուրդն ընտրում է լիազօրներ և սրանք իրենց կողմից ընտրում են պաշտօնատար անձերին:

Այս հիմքերով Ռուսաստանում պէտք է հաստատուել ռամկավար հանրապետութիւն, ինքնակալութիւնը պէտք է չքանայ և նրա տեղ ժողովուրդն ինքը իշխէ իր վրայ: Այս ռամկավար

հանրապետութեան մէջ ամբողջ իշխանութիւնը պէտք է կեդրոնանայ մի մարմնի ձեռքում. նա պէտք է բաժան-բաժան լինի: Ամէն շրջան և համայնք իր գործերի կատարեալ տէրը պէտք է լինի. գիւղերը, գիւղախմբերը և քաղաքները պէտք է լայնօրէն ինքնավար լինեն, իրենց գործերը իրենք կառավարեն:

Սակայն Ռուսաստանը շատ ընդարձակ է և բազմաթիւ ազգեր են ապրում այնտեղ, որոնք ունեն իրենց ուրոյն բարքն ու լեզուն, իրենց պատմական անցեալը: Ի՞նչ պիտի լինի սրանց վիճակը: Մանր ազգերի վերաբերմամբ մեր կուսակցութիւնը պահանջում է, որ ճանաչելի նրանց ինքնորոշման իրաւունքը լիապէս. եթէ որեւէ ազգի մեծամասնութիւնը ցանկանայ՝ այդ ազգը պէտք է կարողանայ վարչապէս և օրէնսդրապէս առանձնանայ Ռուսաստանից: Նա կարող է ունենալ իր սեփական խորհրդարանը և ուրոյն վարչութիւնը՝ իր յարմար դատած ձևով:

Որքան կարելի է, պէտք է աշխատել, որ զատւած ազգերը կապեն դաշնակցական կապերով. այսինքն իրենց կեանքի որոշ կողմերով ներանք պէտք է կապւած լինեն համայն Ռուսաստանի հետ և որոշ կողմերով՝ անկախ: Թանգ գնահատելով ամէն կարգի փոքրամասնութեան իրաւունքները, մենք պահանջում ենք համեմատական ներկայացուցչութիւն, այսինքն՝ ամէն կուսակցութիւն կամ խմբակ պէտք է իր թիւ համեմատութեամբ ներկայացուցիչներ ունենայ:

Մենք պահանջում ենք ուղղակի օրէնսդրութիւն, այսինքն՝ ամէն օրէնք կարող է ոյժ ստանալ և օրէնք ճանաչել միմիայն այն ժամանակ, երբ ամբողջ ժողովուրդի կողմից քւէարկւի և նրա

հաւանութիւնը ստացւի: Օրէնսդրական այս ձևը կոչոււմ է հարցում (րէֆէրէնդում), որովհետև հարցնում են ժողովուրդին և նրա կամքն առնում: Բացի այս, որոշ թւով քաղաքացիներ պէտք է իրաւունք ունենան նոր օրինագծեր առաջարկելու պատգամաւորական ժողովին՝ քննելու համար: Սրան կ'առեն օրէնսդրական նախաձեռնութիւն (ինիցիատիւ): Յաճախ պատգամաւորներն անգամ չգիտեն թէ ի՞նչ օրէնքներ են անհրաժեշտ ժողովուրդին. օրէնսդրական նախաձեռնութիւնը առնում է այդ անյարմարութեան առաջը:

Բոլոր պաշտօնեաները պէտք է ընտրւեն ժողովուրդի կողմից: Ամենամեծից մինչև ամենամանջանը կարող են դատի ենթարկւիլ և արտաքսուիլ, եթէ որեւէ զեղծում կամ ապօրինութիւն կատարեն: Միայն դատաւորները ընտրելու են ցմահ և պատգամաւորները շեն կարող հեռացել իրենց օրինական ժամանակը լրացնելուց առաջ, եթէ, իհարկէ, երկուսն էլ որեւէ քրէական կամ ուրիշ յանցանք չեն գործել: Դատավարութիւնը պէտք է ձրի լինի. ո՞րքան արդար դատեր կորչում են անվճիռ, որովհետև տուժող կողմը դրամ չունի իր դատը վարելու:

Հակառակ լինելով ամէն տեսակ ազգային ճնշման և բռնութեան, մենք պահանջում ենք, որ մայրենի լեզուն մտնէ բոլոր պետական և հասարակական հիմնարկութեանց մէջ: Թէ՛ դատական և թէ՛ վարչական ամէն հիմնարկութեան, ինչպէս նաև ամէն տեսակ հաստատութեանց մէջ պէտք է իշխէ և գործածւի այն լեզուն, որով խօսում է շրջանի ազգարնակութիւնը:

Ամբողջ ժողովուրդը պէտք է ստանայ հաւա-

սար կրթութիւն՝ պետական հաշուով: Կրթութիւնը պէտք է պարտաւորիչ լինի ամէնքի համար և պէտք է աշխարհիկ բնաւորութիւն ունենայ. կրօնը ամէն մարդու խղճի գործը լինելով՝ չպէտք է աւանդւի դպրոցների մէջ:

Սակայն կան շատ շրջաններ, ուր ազգաբնակութիւնը խառն է. թիւրքը, հայն ու ռուսը, օրինակ ապրում են քով-քովի: Ի՞նչպէս պէտք է վարել այս դէպքում: Մեր կարծիքով այն գումարները, որ յատկացնում է պետութիւնը կրթական նպատակների համար, պէտք է բաժանել այս ազգերին՝ իրենց թւի համեմատ: Այնուհետև ամէն ազգութիւն այդ գումարները պէտք է ծախսէ ինքնավար հիմունքներով. այսինքն՝ ինքը պէտք է ընտրէ որոշ անձեր, որոնք և կը տնօրինեն թէ այդ դրամը ի՞նչպէս և ի՞նչի՛ վրայ պիտի ծախուի:

Եկեղեցին պէտք է բաժանել պետութիւնից: Եկեղեցին ամէն ժամանակ պաշտպանել է խաւարն ու բռնութիւնը, ուստի և կառավարութիւնը միշտ նպաստել է նրան. մահմեդականի հարկից գոյացած դրամով կառավարութիւնը տւել է ռուս քահանայի ռոճիկը: Բայց կրօնը ամէն մարդու խղճի գործն է, ուստի ամէն մարդ ազատ է նպաստելու իր դաւանած եկեղեցուն: Պետութիւնը իր ամբողջութեամբ չպէտք է գործ ունենայ եկեղեցու հետ:

Վերջապէս՝ մենք պահանջում ենք վերջէնել մշտական գորքը, որ մի ծանր բեռ է ժողովուրդի մէջքին: Հայրենիքը ամէնքին լինելով ամէն մարդ պարտաւոր է վտանգի ժամին պաշտպանել նրան: Երբ ամէն մարդ զինուոր լինի, այն ժամանակ մշտական գորքի կարիք չի լինի:

կը վերանան երկարամեայ զինուորութիւնը և նրա հետ կապած հրէշաւոր ծախքերը:

ՏՆՏԵՍԱԿԱՆ ՓՈՓՈՒՈՒԹԻՒՆՆԵՐ: — Ընկերների. դուք ծանօթացաք ուրեմն մեր քաղաքական պահանջների հետ. անցնենք այժմ մեր տընտեսական պահանջներին: Մենք պահանջում ենք այն տեսակ տնտեսական փոփոխութիւններ, որոնք պէտք է նպաստեն աշխատաւոր դասակարգի դարգացման և բարեկեցութեան և պատրաստեն ընկերվարութեան վերջնակէսն յաղթանակը:

Պետական տնտեսութեան և ելեմտական (ֆինանսական) քաղաքականութեան մէջ մենք ամէն կերպ ջանալու ենք մտցնել յառաջդիմական (պրոգրէսիվ) տուրք եկամուտի և ժառանգութեան վրայ: Այսինքն՝ օրէնքով ամէն մարդ պէտք է պարտաւոր լինի վճարելու իր տարեկան եկամուտի և ստացած ժառանգութեան որոշ տոկոսը և որքան մեծ լինի այդ ժառանգութիւնը կամ եկամուտը, այնքան աւելի մեծ տոկոս պէտք է վճարէ: Սակայն ամէն եկամուտ հարկ վճարելու չէ: Երկրի ընդհանուր պտուղամաւորական ժողովը պէտք է որոշէ մի նւազագոյն չափ եկամուտների համար: Այդ չափից պակաս եկամուտ ստացողները հարկ չպէտք է վճարեն:

Մենք պէտք է աշխատենք վերացնել բոլոր անուղղակի հարկերը, բոլոր հովանաւորական մաքսերը և ընդհանրապէս այն բոլոր տուրքերը, որոնք վերջիվերջոյ ընկնում են աշխատաւոր ընդհանրութեան վրայ: Այսպէս՝ կառավարութիւնը օտար շաքարի վրայ ահազին մաքս է դրել, որպէսզի մեր երկրի շաքարը ծախուի, կառավարութիւնը ցանկանում է հովանաւորել շաքարի ռուս արդիւնաբերողներին և միլիոնաւոր ժողովուրդը

մի քանի գործարանատէրերի պատճառով պարտաւորւած է թանկ գնով շաքար գնելու : Կառավարութիւնը ամէն մի տուփ լուցկիից որոշ տուրք է առնում և միլիօնաւոր ժողովուրդը ահագին տուրք է վճարում անուղղակի կերպով : Այս տեսակ տուրքերն ու մաքսերը ոչ թէ պիտի առնել այնպիսի ապրանքներից, ինչպէս շաքարն ու լուցկին, որոնք անհրաժեշտ են աշխատաւոր ընդհանրութեանը, այլ պէտք է առնել գարդարանքի և պերճանքի առարկաներից, որոնք միայն հարուստներն են վայելում և որոնց համար բնածանր չէ այդ հարկերը վճարել :

Դուք տեսաք արդէն, որ մեր կուսակցութեան հիմերը կազմում են երկու մեծ դասակարգ . քաղաքի գործաւորը և աշխատաւոր գիւղացին : Այս երկու դասակարգի տնտեսական վիճակը նոյն չափով ծանր է : Երկուսի վիճակն ևս պէտք է բարեփոխել, ուստի մեր ծրագրով որոշած ենք այն բոլոր անհրաժեշտ և հիմնական բարեփոխութիւնները, որ պէտք են նրանց :

Աշխատաւոր դասակարգը միապաղաղ ամբողջութիւն չէ . նա ինքը բաժանւած է տարբեր խաւերի : Կան շահեր, որոնք վերաբերում են ամենքին՝ բանւորութեան ընդհանրապէս, բայց և կան շահեր, որոնք վերաբերում են այս կամ այն գործաւորական խաւին : Մեր նպատակն է պաշտպանել այն շահերը միայն, որոնք ընդհանուր են բովանդակ աշխատաւորութեան համար : Բոլոր նեղ-գործնական, անմիջական, տեղական և արհեստակցական շահերը պէտք է ստորագուեն բանւորութեան ընդհանուր շահերին :

Մեր նպատակն է պաշտպանել բանւոր դասակարգի բոլոր մարմնական և հոգեկան շահերը և

այդ ուղղութեամբ ազդել բանւորական օրէնդրութեան վրայ : Մենք ջանալու ենք ձեռք բերել այն տեսակ փոփոխութիւններ, որոնք նպաստեն աշխատաւոր դասակարգի մարմնաւոր և հոգեկան ոյժերի զարգացման և զօրանալուն, և դրանով աւելի ևս ընդունակ դառնան ընկերվարական յետագայ մեծ և արդիւնաւոր կռիւը մը շինելու :

Այս նկատումներով՝ մենք նախ ձգտում ենք կրճատել գործաւորական օրւայ ժամերի թիւը : Առայժմ արդիւնաբերութեան շատ ճիւղերի մէջ մենք պահանջում ենք հաստատել ութ ժամւայ բանւորական օր : Բայց կան արդիւնաբերութեան այնպիսի ճիւղեր, ուր աշխատանքը չափազանց փաստակար է և վտանգաւոր գործաւորի առողջութեան համար : Այստեղ մենք պահանջում ենք, որ աշխատանքը ութ ժամից պակաս տևէ : Ընդհանրապէս աշխատանքի տևողութիւնը պէտք է համապատասխանէ այն պահանջներին, որ մըշակած է գիտական առողջապահութիւնը :

Պէտք է որոշել օրավարձի նւագագոյն մի չափ, մի մինիմում, որից պակաս գնով մարդ աշխատեցնելը պէտք է խստիւ արգիլել : Այս չափը պէտք է որոշեն մի կողմից ինքնավար մարմինները, օրինակ քաղաքային ինքնավարութիւնը և միւս կողմից՝ բանւորների արհեստակցական միութիւնները :

Բանւորները իրենց աշխատանքի ընթացքում ենթակայ են ամէն տեսակ դժբախտ պատահարներին . մէկի ձեռքն է կտրուում, միւսը հանքի մէջ խեղդամահ է լինում, երրորդը հիւանդանում է՝ թողնելով ընտանիքը անել դրութեան մէջ և այլն : Այս պատահարների հետեանքները



մեղմացնելու համար՝ մենք պահանջում ենք բան-  
ւորների ապահովագրութիւնը պետութեան և  
գործարանատէրերի հաշին՝ իր բոլոր տեսակնե-  
րով— ծերութեան, հիւանդութեան, անգործու-  
թեան և այլ գէպքերի համար: Ապահովագրութեան  
գործը պէտք է վարեն իրենք գործաւորները  
ինքնավար հիմունքներով, այսինքն իրենց ընտ-  
րած մարդկանց միջոցով:

Օրէնքով պէտք է ապահովել աշխատանքը,  
տալով գործաւորներին աշխատանքի առողջ և նը-  
պաստաւոր պայմաններ: Այս նպատակով պէտք  
է բարելաւումներ մտցնել առևտուրի և արդիւ-  
նարերութեան բոլոր ճիւղերում, համաձայն գի-  
տական առողջապահութեան պահանջներին: Բան-  
ւորների կողմից պէտք է ընտրւեն յատուկ վե-  
րատեսուչներ, որոնք պէտք է հսկեն բոլոր գոր-  
ծարանների և աշխատանոցների վրայ և պէտք է  
բարելաւեն աշխատանքի առողջական պայմաննե-  
րը:

Սրանք պէտք է հսկեն, որ բանւորական աշ-  
խատանքը բնականոն (նորմալ) պայմանների մէջ  
կատարւի: որ գործարանների շէնքերը առողջա-  
պահիկ պայմաններով շինւած լինեն և ոչ թէ  
այսօրւան խեղդուկ մթնոլորտն ունենան: Պէտք  
է վերացնեն պայմանաժամից աւել տևող աշխա-  
տանքները:

Պատանիներին մինչև 16 տարեկան հասակը  
պէտք է արգիլեն աշխատեցնել գործարաններում:  
այդ տարիները ուսման պիտի նւիրւած լինեն:  
16-20 տարեկան դեռահասները պէտք է չափա-  
հասներից պակաս աշխատեն: Պէտք է իսպառ-  
արգիլեն մանուկների աշխատանքը և հսկեն, որ  
յուլթեան որոշ ժամանակ կանայք ազատ լինեն

աշխատանքից: Գործաւորներն ամէն շաբաթ  
պէտք է բաւականաչափ հանգիստ ունենան ևն.:

Վերջապէս անհրաժեշտ է, որ բանւորները  
կազմեն արհեստակցական միութիւններ թէ՛ ի-  
րենց շահերը պաշտպանելու և թէ՛ համայնակե-  
ցութեան վարժւելու համար: Այս միութիւն-  
ները գնալով միշտ աւելի մեծ մասնակցութիւն  
պէտք է ունենան աշխատանքի ներքին կազմա-  
կերպութեան մէջ. գործարանների և արհեստա-  
նոցների մէջ աշխատանքի կազմակերպութիւնը և  
բաժանումը պէտք է նրանց մասնակցութեամբ  
կատարւի:

Ընկերներ, մեր ծրագրի ամենաբնութոյն կող-  
մը հողային հարցն է, հողային յարաբերութիւն-  
ների վերակազմութիւնը: Շատերը շարամտու-  
թեամբ ասում են մեզ համար՝ իբր թէ մենք մի-  
այն հողային ծրագիր ունենք: Դուք տեսաք որ  
դա մի զրպարտութիւն է. քաղաքական պահանջ-  
ները և գործաւոր դասակարգի շահերի պաշտ-  
պանութիւնը մեր ծրագրում իր յատուկ տեղն է  
գրաւում: Այդ տարածայնութեան առիթ է  
տւել այն հանգամանքը, որ ո՛չ մէկ կուսակցու-  
թեան ծրագրի մէջ հողային հարցը այնպիսի մեծ  
տեղ չի գրաւում և այնքան կարևորութիւն չունի,  
որքան մեր ծրագրում: Եւ զբաժանալի չէ այդ  
հանգամանքը. մեր երկիրը գերազանցապէս հո-  
ղագործական է և մեր ժողովուրդի ահագին մե-  
ծամասնութիւնը՝ երկրագործ:

Մեր երկրում հողային յարաբերութիւնները  
անբաւարար են և անարգար. մենք ունենք հո-  
ղատէր ազնւականների մի մեծ դասակարգ, որին  
կատկանում է հողի մեծագոյն մասը. հողի  
խոշոր հատւածներ պատկանում են նաև եկեղե-

ցիներին ու վանքերին, պետութեան ու արքայական ընտանիքին: Ժողովուրդը, որ առանց հողի ապրել չի կարող, ամէնից քիչ հող ունի իր ձեռքում: Ընկերավարութեան յաղթանակի համար բաւական չէ կռիւ մղել բուրժուական և մասնաւոր սեփականութեան կարգերի դէմ. պէտք է աշխատաւոր ժողովուրդի օգտին փոխել նախ տիրող հողային անարդար յարաբերութիւնները: Այս կռւի մէջ՝ իբր ամուր յենարան՝ մենք ունենք ժողովրդի դարաւոր կենցաղը և նրա հայեացքները հողի մասին:

Մեր գիւղացին տնտեսական կեանքի մասին ունի մի որոշ և ուրոյն հայեացք, որ բնաւ նման չէ ուրիշ ժողովրդների աշխարհայեացքին: Ինչպէս իր կենցաղը, այնպէս էլ իր աշխատանքները համայնական են և աշխատաւորական: Մեզանում հողը պատկանում է ամբողջ գիւղին՝ համայնքին և ոչ թէ նրա այս կամ այն անդամին: Հողերը պարբերաբար բաժանուում են և մեռած անդամի հողը անցնում է նորածին գիւղացուն: Այսպիսով հողը գիւղում ամէնքին է ընդհանրապէս և ոչ ոքինը՝ մասնաւորապէս: Երբ գիւղացու ժառանգութիւնը պէտք է բաժանել, համագիւղացիք կարեւորութիւն են տալիս ո՛չ թէ արենակցական կապին, այլ այն հանգամանքին թէ ժառանգորդը ո՛ր չափով է մասնակցել իր աշխատանքով բաժանող հարստութիւնը կազմելուն: Այս կարգերը դրաւոր օրէնք չեն, գալիս են հընուց իբր աւանդութիւն, սովորոյթի ոյժով գոյութիւն ունեն:

Յատկապէս մեծ նշանակութիւն ունի մեր ժողովուրդի մէջ տարածւած մի խորին համոզում, որ չնայած աւազակ կառավարութեան ջանքերին՝ արմատախիլ չէ եղած: Մեր գիւղացու խորին համոզմամբ հողը չի կարող որևէ մէկի սեփականութիւն լինել. նա ոչ ոքի չի պատկանում, կամ ինչպէս նա է ասում. «պատկանում է Աստծուն»: Նրա կարծիքով հողից կարելի է օգտւել, բայց երբե՛ք տիրել. իսկ օգտւելու իրաւունք նա՛ ունի միայն, ով աշխատում է այդ հողի վրայ: Որևէ մէկը, թէ՛ կուզ և հողի տէրը լինի նա, եթէ չի աշխատում այդ հողի վրայ, նրանից օգտւելու իրաւունք չունի:

Հիմնւելով մեր ժողովրդի կենցաղի և հայեացքների վրայ՝ մենք պահանջում ենք հողը համայնացնել (սօցիալիզացիա), այսինքն մենք պահանջում ենք հողը հանել ապրանքային շրջանառութիւնից, չթողնել որ ապրանքի նման առ և ծախի առարկայ լինի: Նա չպէտք է պատկանի մասնաւոր անձերին կամ խմբերին, չպէտք է լինի նրանց սեփականութիւնը. նա պէտք է դառնայ համաժողովրդական ստացւածք հետեւեալ հիմունքներով.—

Մեր քաղաքական ծրագրից դուրս արդէն տեսաք, որ ապագայ Ռուսաստանը մենք երևակայում ենք իբրև ինքնավարութիւնների մի ցանց, որոնք կապւած են իրար հետ դաշնակցական կապերով: Բոլոր հողերը պէտք է ենթարկւին այս ինքնավար մարմինների իրաւասութեան, լինեն այդ մարմինները կենդրոնական՝ ինչպէս համայն Ռուսաստանի պատգամաւորական ժողովը թէ տեղական, ինչպէս որևէ գիւղի համայնական խորհուրդը: Այս մարմինները պէտք է լինեն անդասակարգ, այսինքն պետութեան ամէն քանակապարզ, այսինքն պետութեան ամէն քաղաքացի կարող է ընտրել և ընտրուել այդ ինքնավարութեան մէջ. ընտրութիւնները պէտք է

կատարեն ընդհանուր, հաւասար, գաղտնի և ուղղակի քէտարկութեամբ:

Այսպիսով ամէն քաղաք իր հողային գործերը կը կարգաւորէ իր ընտրած խորհուրդի միջոցով, ամէն գիւղ՝ իր համայնական խորհուրդով, գաւառի հողային գործերը կը վարեն գաւառական խորհուրդը, պետական հողերի գործը կը մնայ պատգամաւորական ժողովին և այլն:

Սրանք պէտք է նայեն գաղթումի գործերին, պէտք է հսկեն ազգաբնակչութեան հաւասար սիւնումի վրայ, պէտք վարեն հողավարչութեան գործերը, հողան հողային պահեստի (ֆօնդ) մասին և այլն:

Հողից օգտւելու գործը պէտք կազմակերպել աշխատաւորական-հաւասարող հիմունքներով. այսինքն՝ պէտք է ապահովել գիւղացիների սպառողական նորմը սեփական աշխատանքի հիմունքով, լինի այդ աշխատանքը անհատական թէ ընկերովի՝ միևնոյնն է: Ես իսկոյն կը պարզեմ այս միջին խօսքերի իմաստը:

Դուք տեսաք որ մենք չենք ընդունում հողի մասնաւոր սեփականութիւնը. հողը պատկանում է ամէնքին և ոչ ոքի առանձնապէս: Հողից կարելի է միայն օգտւել, տիրել ոչ ոք չի կարող: Քանի որ հողի տէրն ամէնքն են, ուրեմն ամէնքն էլ իրաւունք ունեն հողից օգտւելու: Բայց ի՞նչ չափով, ասա՛ ինդիրը:

Նախ պէտք է նկատել, որ մենք դէմ ենք ուրիշի աշխատանքը շահագործելուն, որ նշանակում է բանւորներ կամ գործաւորներ աշխատեցնելուն և նրանց աշխատանքով ապրելուն: Ամէն մարդ պէտք է իր սեփական աշխատանքով ապրի: Մի քանի գիւղացիներ կամ նոյնիսկ մի

ամբողջ համայնք կարող են իրենց բաժին ընկած հողերը միացնել, միասին վարել ու ցանել և արգիւնքը իրար մէջ բաժանել. բայց այստեղ ամէնքը հաւասար են, չկայ տէր ու բանւոր: Նրանք միացած են աշխատանքը խնայելու և իրենց գործը աւելի լաւ վարելու համար միայն:

Սրդ, մենակ լինեն գիւղացիները թէ խմբովին, նրանցից ամէն մէկը իրաւունք պէտք է ունենայ այնչափով հողաբաժին ստանալու, որ կարողանայ իր սեփական աշխատանքով իր բոլոր անհրաժեշտ կարիքները հոգալ: Ահա այս չափն է, որ կոչւում է սպառողական նորմ:

Բայց մարդիկ աճում են, լինում են մեռնողներ և նոր ծնւողներ. ի՞նչ պէտք է լինի այս նոր ծնւողների վիճակը: Մեռնող գիւղացիների հողերը պէտք է արւին նոր ծնւածներին. իսկ եթէ գիւղի ազգաբնակչութիւնը այնքան շատանայ, որ համայնքի հողը բաւական չլինի ամէնքի սպառողական նորմը գոհացնելու, այն ժամանակ կարիք ունեցողներին նոր հողեր կը տրւին հողային պահեստից: Այս է, որ կոչւում է հաւասարացում:

Այսպէս ուրեմն, երբ մենք ասում ենք թէ՛ հողից պէտք է օգտւել աշխատաւորական-հաւասարող հիմունքներով և որ պէտք է ապահովել սպառողական նորմը սեփական աշխատանքի հիմունքով՝ այդ աշխատանքը ընկերովի լինի թէ անհատական — նշանակում է, ամէն մարդ կարող է հողից օգտւել միայն այն պայմանով, որ ինքն է հողից օգտւելու միայն այն պայմանով, որ ինքն աշխատի նրա վրայ. նա կարող է այնքան հող ստանալ, որ կարողանայ իր սեփական աշխատանքով կամ իր ընտանիքի և նմանների հետ ընկե-

րանալով՝ ապահովել իր բոլոր կարիքները :

Բայց կան հողեր, որոնք աւելի հասոյթ են տալիս, քան նոյն քանակութեամբ հողի մի ուրիշ կտոր, կամ աւելի արգաւանդ են, կամ մօտ են քաղաքին, երկաթուղիին և այլն : Այս դէպքում առաջ է դալիս եկամուտի մի յատուկ տեսակ, որ կոչուում է հաս (րէնտ) : Այս աւելորդ հողահասը պէտք է առնել հարկի կամ տուրքի ձևով և գործադրելի հանրութեան օգտին :

Կան այն տեսակ բնական հարստութիւններ, որոնք միայն տեղական նշանակութիւն չունին, այլ շահագրգռում են հանրութիւնը : Այսպէս են օրինակ ընդարձակ անտառները, որոնք եթէ անխնամ ձգւին և կտրատւին՝ կարող են փոխել երկրի կլիման և ցամաքեցնել մեծ գետերի աղբիւրները : Թէ ինչպէս պէտք է վարել այս կարգի հարստութեանց հետ՝ այդ հարցը կը լուծեն համապատասխան ինքնավար մարմինները : Եթէ մի հարստութիւն համապետական նշանակութիւն ունի, նրա կարգադրութիւնը կը մնայ համառուսական պատգամաւորական ժողովին . եթէ նա կարևոր է մի շրջանի համար՝ այդ շրջանի ինքնավարութիւնը կը լինի կարգադրողը . եթէ վերաբերում է մի որոշ գաւառին՝ այդ գաւառի ինքնավար խորհուրդը և այլն :

Բայց կան և այն տեսակ հարստութիւններ, որոնք գտնուում են գետնի տակ . այսպէս են բոլոր հանքերը : Ո՞ւմը պէտք է համարեն ներանք : Նրանք կը պատկանեն պետութեան և կը գտնուին նրա իրաւասութեան տակ :

Վերջապէս կայ մի ուրիշ կարևոր հարց : Այսօր հողերի մեծ մասը պատկանում է վանքերին, ազնւականներին և արքայական տանը : Երբ մենք

ասում ենք, որ պէտք է ամբողջ հողը համայնացընել, այդ նշանակում է, որ պէտք է հողն առնել նրա այսօրւայ տէրերից և տալ ժողովրդին : Բայց ի՞նչպէս առնել . դրամով : Այսինքն՝ այդ հողերի համար նրանց այսօրւայ տէրերին պէտք է վճարե՞լ նրանց արժէքը : Ո՞չ : Մեր կարծիքով՝ յեղափոխութեան ժամանակ այդ բոլոր հողերը պէտք է գրաւել առանց վարձատրութեան :

Բայց կայ մի հանգամանք : Այդ հողերի այսօրւայ տէրերը սովորած են ուրիշի աշխատանքով ապրելու : Երբ գրաւեն նրանց հողերը, որ նրանց եկամուտի միակ աղբիւրն է, հողատէրերի վիճակը չափազանց կը ծանրանայ : Մեր ծրագրով հողից կարող է օգտուել նա՛, ով աշխատում է այդ հողի վրայ . այսօրւայ հողատէրերը հազիւ թէ կարողանան անմիջապէս հողագործութեան անցնել : Ի՞նչ պէտք է անել : Մեր ծրագրի տրամադրութեամբ հասարակութիւնը պարտաւոր է առժամապէս նեցուկ հանդիսանալ այդ կարգի անձերին, մինչև որ նրանք կարողանան յարմարել իրենց անհատական գոյութեան նոր պայմաններին : Չպէտք է մոռանալ, որ յեղափոխութիւնը կուի է՝ իրաւունքի անունով, նա ձեռքտոււմ է արդարութեան և ոչ թէ վրիժառութեան . . . :

Վերը յիշած տնտեսութիւններից դուրս՝ կան նաև գիւղական, քաղաքային և դաւառական տնտեսութիւններ, որոնց նպատակն է գոհացնել ազգաբնակչութեան բազմատեսակ կարիքները : Այսպէս է օրինակ ձրի բժշկութիւնը թէ տանը և թէ հիւանդանոցներում . գիւղատնտեսական գործիքների, սերմացուների, հացի և այլ մթերքների մատակարարութեան գործը : Այս և նման

գործերը պէտք է կազմակերպեն գաւառական և շրջանային ինքնավար մարմինները թէ՛ իրենց սեփական միջոցներով և թէ՛ համապետական հասցիների օժանդակութեամբ :

Պէտք է ամէն կերպ նպաստել աշխատաւորական տնտեսութիւնների զարգացման . այս ընկերութիւնները պէտք է կազմակերպելին առաւելագոյն աշխատակցական հիմունքներով և սըրանց նեցուկ լինելու համար պէտք է պետական լայն վարկ բանալ : Պէտք է նպաստել ջուրի , լոյսի , ճանապարհների և ուրիշ հանրօգուտ տնտեսութիւնների համայնացման :

Մեր կարծիքով՝ թէ՛ քաղաքային և թէ՛ գիւղական համայնքները պէտք է լայն իրաւունք ունենան հարկեր դնելու անշարժ կայքերի վրայ և նոյնիսկ ստիպողաբար արտագրաւելու , եթէ այդ անհրաժեշտ է ընդհանուր բարօրութեան , բայց մանաւանդ բանւոր դասակարգի բնակարանային պէտքը գոհացնելու համար :

Մենք պէտք է ամէն կերպ աջակցենք համայնական , գաւառական և համապետական այն քաղաքականութեան , որի նպատակն է գործակցական միութիւնների զարգացման նպաստել , պայմանով որ այդ միութիւնները ռամկավար աշխատաւորական հիւճերի վրայ լինեն :

Մարդկային ամբողջ տնտեսութեան համայնացումը կը կատարւի միայն ընկերվարական կարգերի լիակատար տիրապետութեան ժամանակ , որ հեռուոր ապագայի գործ է : Բայց այսօր՝ բուրժուական կարգերի տիրապետութեան ժամանակ՝ հնարաւոր է թէ՛ մասնաւոր և թէ՛ հասարակական տնտեսութեան այս կամ այն ճիւղը աւելի կամ պակաս չափով համայնացնել :

Մենք դէմ չենք այս կարգի համայնացումներին , բայց մի պայմանով . պէտք է այնպէս անել , որ դրանով բանւոր դասակարգը աւելի ևս մեծ կախում չունենայ պետութեան վարիչ պաշտօնէութիւնից :

Երբ քաղաքական կարգը ռամկավարական չէ , երբ ոյժերի փոխադարձ յարաբերութիւնը շատ աննպաստ է , այսինքն՝ երբ աշխատաւոր դասակարգի կազմակերպւած ոյժը շատ չնչին նշանակութիւն ունի պետական-հասարակական կեանքում , այն ժամանակ այդ տեսակի համայնացումները ո՛չ թէ օգուտ , այլ միայն փնաս կարող են բերել աշխատաւոր դասակարգին :

Այսպէս է , օրինակ , տնտեսութեան համայնացման այն ձևը , որ կոչոււմ է «Պետական Ընկերվարութիւն» , երբ երկաթուղիները և տնտեսութեան շատ ուրիշ ճիւղեր պատկանում են պետութեան : Մենք զգուշացնում ենք այս տեսակ «ընկերվարութիւնից» : Սրանով պետութիւնը հանդիսանում է մի տեսակ դրամատէր , արգիւնաբերութեան և առևտուրի որոշ ճիւղեր կենդրոնանում են տիրող պաշտօնէութեան ձեռքում և նա այդ ամէնը ծառայեցնում է իր հարկահանութեան և քաղաքական նպատակներին : Պետական ընկերվարութիւնը թմրեցնում է բանւոր դասակարգի գիտակցութիւնը և հեռացնում է աշխատաւորութեան արդար դատի վերջնական յաղթանակը :

Մղելով մեր անդուլ կուրը ինքնակալութեան դէմ՝ մենք պահանջում ենք Հիմնարկու ժողով . այսինքն՝ ժողովուրդի ընտրած պատգամաւորներին մի ժողով , որոնք պիտի քննարկեն ընդհանուր , հաւասար , գաղտնի և ուղղակի ձայնատը-

ուութեամբ և որոնց պաշտօնը պէտք է լինի պետական նոր կեանքի հիմունքները գնել և իշխանութիւնների սահմանները գծել, հաշիւը մաքրելով ինքնակալութեան հետ և վերակազմելով այսօրւան բոլոր անարդար կարգերը:

Այս վերակազմութեան ոգին պէտք է լինի հաստատել ազատ ժողովրդական կառավարութիւն, մտցնել անձնական անհրաժեշտ ազատութիւններ և պաշտպանել աշխատանքի բովանդակ շահերը:


Վերակազմութեան այս ծրագրով գործում ենք ներկայումս, միևնոյն ծրագիրը պաշտպանելու ենք թէ՛ Հիմնարկու ժողովում և թէ՛ յեղափոխութեան ժամանակ անմիջապէս մտցնելու ենք կեանքի մէջ:

Ընկերներ, ես վերջացրի: Դուք տեսաք, որ մեր ամբողջ ծրագիրը, մեր բոլոր պահանջները մի բարձր և վեհ նպատակ ունին. պաշտպանել ժողովրդի ընդհանրութեան՝ աշխատաւոր մարդկութեան՝ կամ որ նոյն է՝ գործաւոր դասակարգի և աշխատաւոր գիւղացու բոլոր կենսական շահերը և բռնաբարւած իրաւունքները:

Սորապէս համոզւած՝ որ այն շարժումը որին ծանուցում ենք, ամենից արդարն է, որ երբ և իցէ եղած է պատմութեան մէջ և ջերմապէս յուսալով, որ մի օր համայն մարդկութիւնը պէտք է կազմէ մի ահագին ընկերվարական համերաշխ ընտանիք, մենք առանց չեղումի և յամառութեամբ շարունակում ենք մեր դժւարին, բայց սրբազան կռիւը, հրաւիրելով միանալ մեզ հետ այն բոլոր մարդկանց, որոնք ազնիւ սիրա և ւաւազոյն խիղճ ունին:

— օ ( Վ Ե Ր Զ )





«ՀԱՅՐԵՆԻԲ» Ի ՀԲԱՏԱՐԱԿՈՒԹԻՒՆՆԵՐ

- 1.— ԱՆԳՈՆԵՐԿԷ, Վէպ Յոյն յեղափոխական կեանքէ, Ս. Բսէնոսի, թարգմ. Ի. Ա. Երան.— Գին \$1.00 արտասահման 5 ֆրանք:
- 2.— ԱՐՇԱԼՈՅՍ, արամա թիւրքահայ կեանքէն վարդգէսի.— Գին 10 սէնթ, արտասահման 50 սանթիմ:
- 3.— ՄՕՍՈՒՆ ԵՒ ՋՕՒԻ ԱՐՇԱՐԱՆՔՆԵՐԷ, Օննիկի.— Գին 10 սէնթ, արտասահման 50 սանթիմ:
- 4.— ՅԵՂԱՓՈՆԱԿԱՆ ՎԻՊԱԿՆԵՐ, Միրզազօրի.— Գին 5 սէնթ, արտասահման 25 սանթիմ:
- 5.— ՍԱՀՄԱՆԱԿՐԱԿԱՆ ԿԱՌԱՎԱՐՈՒԹԻՒՆՆԵՐ, Յ. Չազմազճեանի, (մամուլի տակ):
- 6.— ՀԱՅՐԵՆԻԲ ԵՐԿԱՐԱՆ, գին 2.50 տալեր, Տաճկաստանի համար զեղջւած 37.50 դրուշ:
- 7.— ՌՈՒՍ ՍՕՏԻԱԼ-ՅԵՂԱՓՈՆԱԿԱՆՆԵՐԻ ՄՐԱԿԻՐԷ, թարգմ. Ն. Հանդոյց.— Գին 10 սէնթ, Տաճկաստանի համար զեղջւած՝ 2 դրուշ:

Ստանալու համար գրիմել՝

HAIRENIK PRESS  
9 Knapp St. BOSTON, Mass. (U. S. A.)

«Ազգային գրադարան»



NL0199502



20.565